

宋十五家詩選

宋十五家詩選

東海 陳 訐

蘇 軾

字子瞻眉州眉山嘉祐二年進士母憂起復調福昌主簿以薦試秘閣對制策入三等除大理評事簽書鳳翔府判官入判登聞鼓院召試直史館丁父憂還朝與王介甫議不合判官告院攝開封府推官出判杭州知密徐湖三州以爲詩謗訕逮赴臺獄謫黃州團練副使安置築室於東坡自號東坡居士移常州哲宗立復朝奉郎知登州召爲禮部郎中遷起居舍人除翰林學士兼侍讀權知禮部貢舉尋以龍圖閣學士出知杭州召爲翰林承旨數月知潁州徙揚州復召爲兵部尚書兼侍讀改禮部兼端明殿學士出知定州紹聖初貶寧遠軍節度副使惠州安置又貶瓊州別駕居儋耳徽宗立移廉州團練副使徙永州提舉玉局觀復朝奉郎建中靖國元年卒於常州南渡孝宗朝贈太師諡文忠詩有東坡集

陳後山云蘇詩始學劉禹錫故多怨刺晚學李太白至其得意則似之矣又云坡詩畧如昌黎有汗漫者有典嚴者有麗縉者有簡淡者翁張開闔千變萬態蓋自以其力量爲之然非木色他人無許大力量氣魄恐不可學許彥周云東坡詩不可指摘輕議辭源如長江大河飄沙捲沫枯槎束薪蘭舟繡鷁皆隨流矣珍泉幽澗澄澤靈沼可愛可喜無一點塵滓氣只是體不似江河讀者幸以此意求之韓子蒼云東坡詩文如天花變現初無根葉不可揣測

東坡五七古才大思精沉鬱頓挫昌黎而後一人而已近體超妙精卓盡態極妍語溪詩鈔序謂有用事太多未免失之豐縉汰其過於豐縉者而後有真蘊詩可謂善言蘇詩者矣

辛丑十一月十九日既與子由別於鄧州西門之外  
馬上賦詩一篇寄之

不飲胡爲醉兀兀此心已逐歸鞍發歸人猶自念庭闈今  
我何以慰寂寞登高回首坡隴隔惟見烏帽出復沒苦寒  
念爾衣裘薄獨騎瘦馬踏殘月路人行歌居人樂僮僕怪  
我苦悽惻亦知人生要有別但恐歲月去飄忽寒燈相對  
記疇昔夜雨何時聽蕭瑟君知此意不可忘慎勿苦愛高  
官職

嘗有夜雨對牀  
之言故云爾

### 和子由澠池懷舊

人生到此知何似應似飛鴻踏雪泥泥上偶然留指爪鴻  
飛那復計東西老僧已死成新塔壞壁無由見舊題往日  
崎嶇還記否路長人困蹇驢嘶

往歲馬死於二  
陵騎驢至澠池

### 太白山下早行至橫渠鎮書崇壽院壁

東坡詩選 二  
馬上續殘夢不知朝日昇  
亂山橫翠幃落月淡孤燈  
奔走煩郵吏安閑愧老僧  
再遊應春春聊亦記吾曾

九月二十日微雪懷子由第二首

岐陽九月天微雪已作蕭條歲暮心  
短日送寒砧杵急冷官無事屋廬深  
愁腸別後能消酒白髮秋來已上簪  
近買貂裘堪出塞忽思乘傳問西琛

江上同舟詩滿篋鄭西分馬涕垂膺  
未成報國慙書劍豈不懷歸喪友朋  
官舍度秋驚歲晚寺樓見雪與誰登  
遙知讀易東牕下車馬敲門定不謦

病中大雪數日未嘗起觀號令趙薦以詩相屬戲用其韻答之

經旬卧齋閣終日親荆和不知雪已淡但覺寒無奈飄蕭

牕紙鳴堆壓檐板墮

關中皆以板爲簷

風颭助凝冽幃幔困掀簸

惟思近醇醪未敢窺璨瑤何時反炎赫却欲躬曰磨誰云  
座無氈尚有裘充貨西隣歌吹發促席寒威挫崩騰踏成  
逕繚繞飛入座人歡瓦先融飲僞瓶屢卧嗟余獨愁寂空  
室自困垓欲爲後日賞恐被遊塵澆寒更報新霽皎月懸  
半破有客獨苦吟清夜默自課詩人例窮蹇秀句出寒餓  
何當暴霜雪庶以躡郊賀

歲晚相與餽問爲餽歲酒食相邀呼爲別歲至除夜  
達旦不眠爲守歲蜀之風俗如是余官岐下歲暮思  
歸而不可得故爲此三詩寄子由

東坡詩集  
三  
愧歲

農功各已收歲事得相佐爲歡恐無具假物不論貧山川  
隨出產貧富稱小大冥盤巨鯉橫發籠雙兔卧富人事華  
靡綵繡光翻座貧者愧不能微贄出春磨官居故人少里  
巷佳節過亦欲舉鄉風獨倡無人和

別歲

故人適千里臨別尚遲遲人行猶可復歲行那可追問歲  
安所之遠在天一涯已逐東流水赴海歸無時東鄰酒初  
熟西舍蕪亦肥且爲一日歡慰此窮無悲勿嗟舊歲別行  
與新歲辭去去勿回顧還君老與衰

守歲

欲知垂盡歲有似赴壑虵修鱗半已沒去意誰  
繫其尾雖勤知奈何兒童強不睡相守夜謹謹  
唱更鼓畏添櫓坐久燈燼落起看北斗斜明在  
事恐蹉跎努力盡今夕少年猶可誇

和子由踏青

春風陌上驚微塵遊人初樂歲華新人閒正  
短未怕遊車輪城中居人厭城郭喧闐曉出空四  
驚山草木動簞瓢散野鳥爲馴何人聚衆稱道人遮道賣  
符色怒瞋宜蠶使汝繭如甕宜畜使汝羊如膺路人未必  
信此語強爲買服襪新春道人得錢徑沽酒醉倒自語吾  
符神

遮况欲  
難且勿  
無年心

旁飲麥



和子由論書

吾雖不善書曉書莫如我苟能通其意常謂不學可貌妍  
容有顰蹙美何妨脩端莊雜流麗剛健含婀娜好之每自  
譏不謂子亦頗書成輒棄去繆被旁人褻體勢本濶畧結  
束入細麼子詩亦見推語重未敢荷邇來又學射力薄愁  
官箚官箚十二把箚多好竟無成不精安用夥何當盡屏能十一把箚耳  
去萬事付懶情吾聞古書法守駿莫如跛世俗筆苦驕衆  
中強鬼賊鍾張忽已遠此語與時左

石鼓

冬十二月歲辛丑我初從政見魯叟舊聞石鼓今見之文  
字鬱律蛟蛇走細觀初以指畫肚欲讀嗟如箝在口韓公

好古生已遲我今况又百年後強尋偏旁推點畫時得一

二遺八九我車旣攻馬亦同其魚維鱖貫之柳

其詞云我車旣攻我

馬旣同又云其魚維何維鱖維何只貫之惟楊與柳惟此六句可讀餘多不可通古器縱橫猶識

鼎衆星錯落僅名斗模糊半已似癡牴詰曲猶能辨跟肘

娟娟缺月隱雲霧濯濯嘉禾秀良莠漂流百戰偶然存獨

立千載誰與友上追軒頤相唯諾下揖冰斯同穀穀憶昔

周宣歌鴻鴈當時籀史變蝌蚪厭亂人方思聖賢中興天

爲生耆耆東征徐虜闕虓虎北伏犬戎隨措噤象胥雜沓

貢狼鹿方邵聯翩賜圭卣遂因鼓鼙思將帥豈爲考擊煩

矐矐何人作頌比崧高萬古斯文齊岫嶠勳勞至大不矜

伐文武未遠猶忠厚欲尋年歲無甲乙豈有名字記誰某

自從周衰更七國竟使秦人有九有掃除詩書誦法律投  
棄俎豆陳鞭杻當年何人佐祖龍上蔡公子牽黃狗登山  
刻石頌功烈後者無繼前無偶皆云皇帝巡四國烹滅強  
暴救黔首六經既已委灰塵此鼓亦當遭擊剖傳聞九鼎  
淪泗上欲使萬夫沈水取暴君縱欲窮人力神物義不汙  
秦垢是時石鼓何處避無乃天工令鬼守興亡百變物自  
閑富貴一朝名不朽細思物理坐歎息人生安得如汝壽  
王維吳道子畫

何處訪吳畫普門與開元有東塔摩詰蘭手痕吾觀  
畫品中莫如二子尊道子實雄放浩如海波翻當其下手  
風雨快筆所未到氣已吞亭亭雙林間彩筆扶桑暎中有

至人談寂滅悟者悲涕迷者手自捫蠻君鬼伯千萬萬相  
排競進頭如龍摩詰本詩老佩芷襲芳蓀今觀此壁畫亦  
若其詩清且敦祇園弟子盡鶴骨心如死灰不復溫門前  
兩叢竹雪節貫霜根交柯亂葉動無數一一皆可尋其源  
吳生雖妙絕猶以畫工論摩詰得之於象外有如仙翻謝  
龍焚吾觀二子皆神俊又於維也歛衽無間言

李氏園

李茂正園也今  
爲王氏所有

朝遊北城東回首見修竹下有朱門家破墻圍古屋舉鞭  
叩其戶幽響答空谷入門所見夥十步九移目異花兼四  
方野鳥喧百族其西引溪水活活轉墻曲東注入溪林林  
溪牕戶綠水光兼竹淨時有獨立鵲林中百尺松歲久蒼

鱗蹙豈惟此地少意恐關中獨小橋過南浦夾道多喬木  
隱如城百雉挺若舟千斛陰陰日光淡黯黯秋氣蓄盡東  
爲方池野鴈雜家鶯紅梨驚合抱映島孤雲覆春光水溶  
漾雪陣風飈撲其北臨長溪波聲捲平陸北山卧可見蒼  
翠間磽确我時來周覽問此誰所築云昔李將軍負險乘  
寒叔抽錢算閭口但未權羹粥當時奪民田失業安敢哭  
誰家美園圃籍沒不容贖此亭破千家鬱鬱城之麓將軍  
竟何事蟻蝨生刀韞何嘗載美酒來此駐車轂空使後世  
人聞名頸猶縮俗稱呼皇后園蓋  
茂正稱其妻也我今官正閑屢至因休  
沐人生營居止竟爲何人卜何當辦一身永與清景逐

秦穆公墓

秦泉在城東墓在城中無百步乃知昔未有此城秦人以  
泉識公墓昔公生不誅孟明豈有死之日而忍用其良乃  
知三子徇公意亦如齊之二子從田橫古人感一飯尚能  
殺其身今人不復見此等乃以所見疑古人古人不可望  
今人益可傷

將往終南和子由見寄

人生百年寄鬢鬚富貴何啻葭中葦惟將翰墨畱染濡絕  
勝醉倒顰眉扶我今廢學如寒竿久不吹之澁欲無歲云  
暮矣嗟幾餘欲往南溪侶禽魚秋風吹雨涼生膚夜長耿  
耿添漏壺窮年弄筆衫袖烏古人有之我願如終朝危坐  
學僧趺閉門不出閑履屨下視官爵如泥淤嗟我何爲久

脚躡歲月豈肯爲汝居僕夫起餐秣我駒

七月二十四日以久不雨出禱礪溪是日宿號縣二  
十五日晚自號縣渡渭宿於僧舍曾閣閣故曾氏所  
建也夜久不寐見壁有前縣令趙薦甯名有懷其人  
龕燈明滅欲三更欹枕無人夢自驚溪谷留風終夜響亂  
山銜月半牀明故人漸遠無消息古寺空來有姓名欲向  
礪溪問姜叟僕夫屢報斗杓傾

是日自礪溪將往陽平憇於麻田青峯寺之下院翠  
龍亭

不到峯前寺空來渭水邨此亭聊可喜修徑豈辭捫谷映  
朱欄秀山含古木尊路窮驚石斷林缺見河奔馬困嘶青

艸僧留薦晚餐我來秋日午旱久石牀溫安得雲如蓋能  
令雨瀉盆共看山下稻涼葉晚翻翻

二十七日自陽平至斜谷宿於南山中礬龍寺

橫槎晚渡碧澗口騎馬夜入南山谷

音落

谷中暗水響瀧瀧

嶺上疎星明煜煜寺藏巖底千萬仞路轉山腰三百曲風  
生餓虎嘯空林月黑驚麝竄修竹入門突兀見淡殿照佛  
青燐有殘燭愧無酒食待遊人旋斫杉松煮溪葑板閣獨  
眠驚旅枕木魚曉動隨僧粥起觀萬瓦鬱參差日亂千巖  
散紅綠門前商賈負椒殍山後咫尺連巴蜀何時歸耕江  
上田一夜心逐南飛鵠

仙遊潭



翠壁下無路何年雷雨穿光搖巖上寺溪到影中天我欲  
然犀看龍應抱寶眠誰能孤石上危坐試僧禪

漢陂魚

陂在鄂縣

霜筠細破爲雙掩中有長魚如卧劍紫荇穿顰氣慘悽紅  
鱗照坐光磨閃攜來雖遠鬣尚動烹不待熟指先染坐客  
相看爲解顏香梗飽送如填塹早歲嘗爲荆渚客黃魚屢  
食沙頭店濱江易採不復珍盈尺輒棄毋乃僭自從西征  
復何有欲致南烹嗟久欠游鱸瑣細空自腥亂骨縱橫動  
遭砭故人遠餽何以報客組久空驚忽贍東道無辭信使  
頻西隣幸有庖鼈醢

十二月十四日夜微雪明日早往南溪小酌至晚

南溪得雪真無價走馬來看及未消  
獨自披榛尋履迹最先犯曉過朱橋  
誰憐破屋眠無處坐覺邨饑語不常  
惟有暮鷄知客意驚飛千片落寒條

司竹監燒韋園因召都巡檢柴貽勗左藏以其徒會  
獵園下

官園刈葦歲畱槎溪冬放火如紅霞  
枯槎燒盡有根在春雨一洗皆萌芽  
黃狐老兔最狡捷賣侮百獸常矜誇  
年年此厄竟不悟但愛蒙密爭來家  
風迴焰卷毛尾熟欲出已被蒼鷹遮  
野人來言此最樂徒手曉出歸滿車  
巡邊將軍在近邑呼來颯颯從矛叉  
戍兵久閒可小試戰鼓雖凍猶堪撾  
雄心欲搏南澗虎陣勢頗學常山蛇  
霜乾火烈聲爆

野飛走無路號且呀迎人截來若逢箭避犬逸去窮投置  
擊鮮走馬殊未厭但恐落日催棲鴉弊旗什鼓坐數獲鞍  
挂雉兔肩分饌主人置酒聚狂客紛紛醉語晚更譁燎毛  
燔肉不服割飲啗直欲追羲媧青丘雲夢古所詫與此何  
啻百倍加苦遭諫疏說夷羿又被賦客嘲淫奢豈如閑官  
走山邑放曠不與趨朝衙農工已畢歲云暮車騎雖少賓  
殊佳酒酣上馬去不告獵獵霜風吹帽斜

和董傳留別

纔緡大布裘生涯腹有詩書氣自華厭伴老儒烹瓠葉強  
隨舉子踏槐花囊空不辦尋春馬眼亂行看擇壻車得意  
猶堪誇世俗詔黃新溼字如鴉

次韻柳子玉見寄

薄雷輕雨曉晴初，陌上春泥未濺裾。  
行樂及時雖有酒，出門無侶漫看書。  
遙知寒食催歸騎，定把鷗夷載後車。  
他日見邀須強起，不應辭病似相如。

送曾子固倅越得燕字

醉翁門下士，雜遝難爲賢。  
曾子獨超軼，孤芳陋羣妍。  
昔從南方來，與翁兩聯翩。  
翁今自樵悴，子去亦宜然。  
賈誼窮適楚，樂生老思燕。  
那因江鱸美，遽厭天庖羶。  
但苦世論隘，聒耳如蜩蟬。  
安得萬頃池，養此橫海鱣。

王願赴建州錢監求詩及艸書

我昔識子自武功，寒廳夜語樽酒同。  
酒闌燭盡語不盡，倦

僕立寐僵屏風丁寧勸學不死訣自言親受方瞳翁嗟余  
聞道不早悟醉夢顛倒隨盲聾爾來憂患苦推剝意思蕭  
索如霜蓬羨君顏色愈少壯外慕漸少由中充河車挽水  
灌腦黑丹砂伏火入頰紅大梁相逢又東去但道何日辭  
樊籠未能便乞峒嶠令官曹似是錫與銅畱詩河上慰離  
別艸書未暇緣匆匆

石蒼舒醉墨堂

人生識字憂患始姓名粗記可以休何用艸書誇神速開  
卷懍懍令人愁我嘗好之每自笑君有此病何年瘳自言  
其中有至樂適意無異逍遙遊近者作堂名醉墨如飲美  
酒銷百憂乃知柳子語不妄峭峭土炭如珍羞若於此藝

亦云至堆墻敗筆如山丘興來一揮百紙盡駿馬倏忽踏  
九州我書意造本無法點畫信手煩推求胡爲議論獨見  
假隻字片紙皆藏收上減鍾張君自足下方羅趙我亦優  
不須臨池更苦學完取絹素充衾裯

次韻子由綠筠堂

愛竹能延客求詩剩挂牆風梢千蠹亂月影萬夫長谷鳥  
驚基響山峰識酒香只應陶靖節會聽北牕涼

送文與可出守陵州

壁上墨君不解語見之尚可消百憂而况我友似君者素  
節凜凜欺霜秋清詩健筆何足數逍遙齊物追莊周奪官  
遣去不自覺曉梳脫髮誰能收江邊亂山亦如赭陵陽正

東坡詩集  
在子山頭君知遠別懷抱惡時遣墨君解我愁

出都來陳所乘船上有題小詩八首不知何人作有  
感余心者聊爲和之

蛙鳴青艸泊蟬噪垂楊浦吾行亦偶然及此新過雨  
烟火動邨落晨光尚熹微田園處處好淵明胡不歸  
我行無疾徐輕楫信溶漾船留邨市鬧鬧發寒波漲  
舟人苦炎熱宿此喬木灣清月未及上黑雲如頽山

傅堯俞濟源艸堂

微官共有田園興老罷方尋隱退廬栽種成陰十年事倉  
皇求買萬金無先生卜築臨清濟喬木如今似畫圖鄰里  
亦知偏愛竹春來相與護龍緋

和柳子玉過陳絕糧

次韻

如我自觀猶可厭非君誰復肯相尋  
圖書跌宕悲年老燈火青熒語夜深  
早歲便懷齊物意微官敢有濟時心  
南行千里成何事一聽秋濤萬鼓音

顏州初別子由

近別不改容遠別涕沾胸咫尺不相見  
實與千里同人生無離別誰知恩愛重  
始我來宛丘牽衣舞兒童便知有此恨  
留我過秋風秋風亦已過別恨終無窮  
問我何年歸我言歲在東離合既循環  
憂喜迭相攻悟此長太息我生如飛蓬  
多憂髮早白不見六一翁

十月一日將至渦口五里所遇風留宿



長淮久無風放意弄清快今朝雪浪滿始覺平野隘兩山  
控吾前吞吐久不暇孤舟繫桑本終夜舞澎湃舟人更傳  
呼弱纜恃營蒯平生傲憂患久已恬百怪鬼神欺吾窮戲  
我聊一噫餅中尚有酒信命誰能戒

出潁口初見淮山是日至壽州

我行日夜向江海楓葉蘆花秋興長平淮忽迷天遠近青  
山久與船低昂壽州已見白石塔短棹未轉黃茅岡波平  
風軟望不到故人久立烟蒼茫

泗州僧伽塔

我昔南行舟繫汴逆風三日沙吹面舟人共勸禱靈塔香  
火未收旗脚轉回頭頃刻失長橋却到龜山未朝飯至人

無心何厚薄我亦懷私欣所便耕田欲雨刈欲晴去得順  
風來者怨若使人人禱輒遂造物應須日千變我今身世  
兩悠悠去無所逐來無戀得行固願留不惡每到有求神  
亦倦退之舊云三百尺澄觀所營今已換不嫌俗士汙丹  
梯一看雲山遶淮甸

遊金山寺

我家江水初發源宦遊直送江入海聞道潮頭一丈高天  
寒尚有沙痕在中泠南畔石盤陀古來出沒隨濤波試登  
絕頂望鄉國江南江北青山多羈愁畏晚尋歸舫山僧苦  
留看落日微風萬頃靴文細斷霞半空魚尾赤是時江月  
初生魄二更月落天深黑江心似有炬火明飛焰照山樓

鳥驚悵然歸卧心莫識非鬼非人竟何物江山如此不歸  
山江神見怪驚我頑我謝江神豈得已有田不歸如江水  
是夜所見如此

自金山放船至焦山

金山樓觀何耽耽撞鐘擊鼓聞淮南焦山何有有修竹採  
薪汲水僧兩三雲霾浪打人迹絕時有沙戶祈春蠶我來  
金山更留宿而此不到心懷慙同遊盡返決獨往賦命窮  
薄輕江潭清晨無風浪自湧中流歌嘯倚半酣老僧山下  
驚客至迎笑喜作巴人談自言久客忘鄉井只有彌勒爲  
同龕困眠得就紙帳暖飽食未厭山蔬甘山林饑卧古亦  
有無田不退寧非貪展禽雖未三見黜叔夜自知七不堪

行當投劾謝簪組爲我佳處畱茅庵

吳人謂水中可田者爲沙焦山長老中江

人也

### 臘日遊孤山訪惠勤惠思二僧

天欲雪雲滿湖樓臺明滅山有無水清石出魚可數林簇  
無人鳥相呼臘日不歸對妻孥名尋道人實自娛道人之  
居在何許寶雲山前路盤紆孤山孤絕誰肯廬道人有道  
山不孤紙廳竹屋淡自暖擁褐坐睡依團蒲天寒路遠愁  
僕夫整駕催歸及未晡出山廻望雲木合但見野鶴盤浮  
圖茲遊淡泊歡有餘到家恍如夢遽遽作詩火急追亡逋  
清景一失後難摹

### 李杞寺丞見和前篇復以元韻荅之

獸在藪魚在湖一入池檻歸期無誤隨弓旌落塵土坐使  
鞭箠環呻呼迨胥連保罪及孥近屢獲鹽賊皆坐同保徙其家百日愁歎  
一日娛白雲舊有終老約朱綬豈令山人紆人生何者非  
蓬廬故山鶴怨秋猿孤何時有駕鹿車去掃除白髮煩菖  
蒲麻鞋短後隨獵夫射弋狐兔供朝哺陶潛自作五柳傳  
潘閔畫入三峰圖吾年稊稊今幾餘知非不去慚衛蓬歲  
荒無術歸亡逋鵠則易畫虎難摹

戲子由

宛丘先生長如丘宛丘學舍小如舟常時低頭誦經史忽  
然欠伸屋打頭斜風吹帷雨注而先生不愧旁人羞任從  
飽死笑方朔肯爲雨立求秦優眼前勃侯何足道處置六

鑿須天游讀書萬卷不讀律致君堯舜知無術勸農冠蓋  
闌如雲送老鹽齏甘似蜜門前萬事不挂眼頭雖長低氣  
不屈餘杭別駕無功勞畫堂五丈容旂旄重樓跨空雨聲  
遠屋多人少風騷騷平生所慙今不恥坐對疲氓更鞭箠  
道逢陽虎呼與言心知其非口諾唯居高志下真何益氣  
節消縮今無幾文章小技安足程先生別駕舊齊名如今  
衰老俱無用付與時人分重輕

吉祥寺賞牡丹

人老簪花不自羞花應羞上老人頭醉歸扶路人應笑十  
里珠簾半上鉤

和劉道原見寄

敢向清時怨不容真嗟吾道與君東坐談足使淮南懼歸  
去方知冀北空獨鶴不須驚夜旦羣鳥未可辨雌雄廬山  
自古不到處得與幽人子細窮

和子由開元寺山茶舊無花今歲盛開

長明燈下石欄干長共杉松鬪歲寒葉厚有稜犀甲健花  
淡少態鶴頭丹久陪方丈曼陀雨羞對先生苜蓿盤雪裏  
盛開如有意明年開後更誰看

六月二十七日望湖樓醉書

黑雲翻墨未遮山白雨跳珠亂入船卷地風來忽吹散望  
湖樓下水如天

放生魚鼈逐人來無主荷花到處開水枕能令山俯仰風

船解與月裴徊

七月一日出城舟中苦熱

涼颼呼不來流汗方被體  
稀星乍明滅暗水光瀾瀾香風  
過蓮茨驚枕躍魴鯉欠伸宿酒餘  
起坐濯清泚火雲勢方壯未受月  
露洗身微欲安適坐待東方啟

宿餘杭法喜寺寺後綠野亭望吳興諸山懷孫莘老  
學士

徙倚秋原寺淒涼晚照中  
水流天不盡人遠思何窮問蝶

知秦過看山識禹功

餘杭始皇所舍舟也西止舟枕山竟水繫舟山上

稻涼初吐

蛤柳老半書蟲荷背風繖白蓮腮雨退紅  
追遊慰遲暮覓句效兒童北望蒼溪轉遙憐  
震澤通烹魚得尺素好在紫



韓翁

遊徑山

衆峰來自天目山勢若駿馬奔平川中途勒破千里足金  
鞭玉轡相回旋人言山住水亦住下有萬古蛟龍淵道人  
天眼識王氣結茅宴坐荒山巔精誠貫山石爲裂天女下  
試顏如蓮寒臆暖足來朴握夜鉢呪水降蜿蜒雪眉老人  
朝扣門願爲弟子長參禪爾來廢典三百載奔走吳會輸  
金錢飛樓湧殿壓山谷朝鐘暮鼓驚龍眠晴空偶見浮海  
蜃落日下數投邨鳶有生共處覆載內擾擾膏火同烹煎  
近來愈覺世路隘每到寬處差安便嗟余老矣百事廢却  
尋舊學心茫然問龍乞水歸洗眼欲看細字銷殘年

龍井中水

洗病眼  
甚有效

### 焦千之求惠山泉詩

茲山定空中乳水滿其腹遇隙則發見臭味實一族淺淺  
各有值方圓隨所蓄或爲雲洶涌或作綫斷續或鳴空洞  
中雜佩間琴筑或流蒼石縫宛轉龍鸞蹙餅罌走四海真  
僞半相賣貴人高晏罷醉眼亂紅綠赤泥開方印紫餅截  
圓玉傾甌共歡賞竊語笑僮僕豈知泉上僧盥灑自挹掬  
故人憐我病萬範寄新篴欠仲北牕下晝睡羹方熟精品  
厭凡泉願子致一斛

沈諫議召遊湖不赴明日得雙蓮於北山下作一絕  
持獻沈旣見和又別作一首用其韻

東坡詩選  
湖上棠陰手自栽問公更得幾回來水仙亦恐公歸去故  
遣雙蓮一夜開

詔書行捧縷金牋樂府應歌相府蓮莫忘今年花發處西  
湖西畔北山前

和歐陽少師寄趙少師次韻

朱門有遺啄千里來燕雀公家冷如水百語無一諾平生  
親友半遷逝公雖不怪旁人愕世事如今臘酒濃交情自  
古春雲薄二公凜凜和非同疇昔心親豈貌從白頭相暎  
松間鶴清句更酬雪裏鴻何日楊雄一廛足却追范蠡五  
湖中

望海樓晚景

海上濤頭一線來樓前相顧雪成堆從今潮上君須上更  
看銀山二十回

青山斷處塔層層隔岸人家喚欲磨江上秋風晚來急爲  
傳鐘鼓到西興

試院煎茶

蟹眼已過魚眼生飈飈欲作松風鳴蒙茸出磨細珠落眩  
轉遶甌飛雪輕銀瓶瀉湯誇第一未識古人煎水意

古語云煎

水不煎茶君不見昔時李生好客手自煎貴從活火發新泉又

不見今時潞公煎茶學西蜀定州花瓷琢紅玉我今貧病  
長苦饑分無玉盃捧瓊屑且學公家作茗飲磚爐石銚行  
相隨不用撐腸拄腹文字五千卷但願一甌常及睡足日

高時

孫莘老求墨妙亭詩

蘭亭繭紙入昭陵世間遺跡猶龍騰顏公變法出新意細  
筋入骨如秋鷹徐家父子亦秀絕字外出力中藏稜嶒山  
傳刻典刑在千載筆法留陽冰杜陵評書貴瘦硬此論未  
公吾不愚短長肥瘠各有態玉環飛燕誰敢憎吳興太守  
真好古購買斷缺揮纖縑龜趺入坐竊隱壁空齋晝靜聞  
登登奇蹤散出走吳越勝事傳說誇友朋書來乞詩要自  
寫爲把栗尾書谿藤後來視今猶視昔過眼百歲如風燈  
他年劉郎憶賀監還道同時須伏膺

秋懷二首

苦熱念西風常恐來無時及茲遂淒涼又作徂年悲蟋蟀  
鳴我牀黃葉投我幃牕前有棲鵬夜嘯如狐狸露冷梧葉  
脫孤眠無安枝耀耀亦求偶高屋飛相追定知無幾見迫  
此清霜期物化逝不留我興爲嗟咨便當勤秉燭爲樂戒  
暮遲

海風東南來吹盡三日雨空階有餘滴似與幽人語念我  
平生歡寂寞守環堵壺漿慰作勞裹飯救寒苦今年秋應  
熟過從飽鷄黍嗟我獨何求萬里涉江浦居貧豈無食自  
不安畎畝念此坐達晨殘燈翳復吐

梵天寺見僧守詮小詩清婉可愛次韻

但聞烟外鐘不見烟中寺幽人行未已草露溼芒屨惟應

山頭月夜夜照來去

和陳述古拒霜花

千林掃作一番黃只有芙蓉獨自芳  
喚作拒霜知未稱細思却是最宜霜

是日宿水陸寺寄北山清順僧二首

艸沒河堤雨暗邨寺藏修竹不知門  
拾薪煮藥憐僧病掃地燒香淨客魂  
農事未休侵小雪佛燈初上報黃昏  
年來漸識幽居味思與高人對榻論

長嫌鐘鼓聒湖山此境蕭條却自然  
乞食遠邨真爲飽無言對客本非禪  
披榛覓路衝泥入洗足關門聽雨眠  
遙想後身窮賈島夜寒應伴作詩肩

將之湖州戲贈莘老

餘杭自是山水窟。仄聞吳興更清絕。湖中橘林新著霜。溪上茗花正浮雪。願將茶牙白於齒。梅溪水瓜紅勝頰。吳兒鱸縷薄欲飛。未去先說饒涎垂。亦知謝公到郡久。應怪杜牧尋春遲。鬢絲只好對禪榻。湖亭不用張水嬉。

遊道場山何山

道場山頂何山麓。上徹雲峯下幽谷。我從山水窟中來。尚愛此山看不足。陂湖行盡白漫漫。青山忽作龍蛇盤。山高無風松自響。誤認石齒號驚湍。山僧不放山泉出。屋底清池照瑤席。堦前合抱香入雲。月裏仙人親手植。出山回望翠雲鬟。碧瓦朱欄縹緲間。白水田頭問行路。小溪溪處是



何山高人讀書夜達旦至今山鶴鳴夜半我今廢學不歸  
山山中對酒空三歎

贈莘老

嗟余與子久離羣耳冷心灰百不聞若對青山談世事當  
須舉白便浮君

天目山前淥浸裾碧闌堂下看銜鱸作堤捍水非吾事閒  
送苕溪入太湖

夜來雨洗碧巖旼浪湧雲屯遶郭寒聞有弁山何處是爲  
君四面竟來看

夜橋燈火照溪明欲放扁舟取次行覓借官奴遣吹笛明  
朝新月到三更

三年京國厭藜蒿長羨淮魚壓楚糟今日駱駝橋下泊恣  
看修網出銀刀

秀州報本禪院鄉僧文長老方丈

萬里家山一夢中吳音漸已變兒童每逢蜀叟談終日便  
覺峨眉翠掃空師已忘言真有道我除搜句百無功明年  
采藥天台去更欲題詩滿浙東

宋叔達家聽琵琶

數絃已品龍香撥半面猶遮鳳尾槽新曲翻從玉連鎖舊  
聲終愛鬱輪袍夢迴只記歸舟字賦罷雙垂紫錦絛何異  
烏孫送公主碧天無際鴈行高

次韻答章傳道見贈

竝生天地宇同閱古今宙視下則有高無前孰爲後達人  
千鈞弩一弛難再鼓下士沐猴冠已繫猶跳驟欲將駒過  
隙坐待石穿溜君看漢唐主宮殿悲麥秀而況彼區區何  
異一醉富爰居非所養俯仰眩金奏鬻饑有餘樂不博南  
面后嗟我昔少年守道貧非疾自從出求仕役物恐有罔  
馬融既依梁班固亦事竇效顰豈不欲頑質謝鐫鏤仄聞  
長者言悻直非養壽唾而慎勿拭出胯當俯就居然成懶  
廢敢復齒豪右子如照海珠罔目疎見滿宏材乏近用巧  
舞困短袖坐令傾國容臨老見邂逅吾衰信久矣書絕十  
年舊門前可羅雀感子煩屢扣願言歌緇衣子榮予還授

法惠寺橫翠閣

朝見吳山橫暮見吳山縱吳山故多態轉側爲君容幽人  
起朱閣空洞更無物惟有千步岡東西作簾額春來故國  
歸無期人言悲秋春更悲已泛平湖思濯錦更看橫翠憶  
峨眉珮欄能得幾時好不獨憑欄人易老百年興廢更堪  
哀懸知草莽化池臺遊人尋我舊遊處但覓吳山橫處來  
正月二十一日病後述古邀往城外尋春

屋上山禽苦喚人檻前冰沼忽生鱗老來厭逐紅裙醉病  
起空驚白髮新卧聽使君鳴鼓角試呼稚子整冠巾曲欄  
幽榭終寒窘一看郊原浩蕩春

· 飲湖上初晴後雨二首

朝曦迎客盪重岡晚雨留人入醉鄉此意自佳君不會一

孟當屬水仙王

湖上有水仙王廟

水光瀲灩晴方好  
山色空濛雨亦奇  
欲把西湖比西子  
淡粧濃抹總相宜

風水洞二首和李節推

風轉鳴空穴  
泉幽瀉石門  
虛心聞地籟  
妄意覓桃源  
過客詩難好  
居僧語不繁  
歸綰得冰雪  
清冷慰文園

山前雨水隔塵凡  
山上仙風舞檜杉  
細細龍鱗生亂石  
團團羊角轉空巖  
馮夷窟宅非梁棟  
禦寇車輿謝轡銜  
世事漸艱吾欲去  
永隨二子脫譏讒

新城道中二首

東風知我欲山行  
吹斷簷間積雨聲  
嶺上晴雲披絮帽  
樹

頭初日挂銅鉦野桃含笑竹籬短溪柳自搖沙水清西崦  
人家應最樂煮芹燒筍餉春耕

身世悠悠我此行溪邊委轡聽溪聲散材畏見搜林斧疲  
馬思聞卷旆鉦細雨足時茶戶喜亂山深處長官清人間  
岐路知多少試向桑田問耦耕

### 山邨

竹籬茅屋趁溪斜春入山邨處處花無象太平還有象孤  
烟起處是人家

烟雨濛濛雞犬聲有生何處不安生但教黃犢無人佩布  
穀何勞也勸耕

老翁七十自腰鎌慙愧春山筍蕨甜豈是聞韶解忘味爾

來三月食無鹽

杖藜果飯去匆匆過眼青錢轉手空贏得兒童語音好一  
年強半在城中

湖上夜歸

我飲不盡器半酣尤味長籃輿湖上歸春風吹面涼行到  
孤山西夜色已蒼蒼清吟雜夢寐得句旋已忘尚記梨花  
邨依依聞暗香入城定何時賓客半在亡睡眠忽驚雙繁  
燈鬧河塘市人拍手笑狀如失林麋始悟山野姿異趣難  
自強人生安爲樂吾策殊未良

與臨安令宗人同年劇飲

我雖不解飲把盞歡意足試呼白髮感秋人令唱黃雞催

曉曲與君登科如隔晨弊袍霜葉空殘綠如今莫問老與  
小兒子森森如立竹黃鷄催曉不須愁老盡世人非我獨  
會客有美堂周邠長官與數僧同泛湖往北山湖中  
聞堂上歌笑聲以詩見寄因和二首時周有服

藹藹君詩似嶺雲從來不許醉紅裙不知野屐穿山翠惟  
見輕橈破浪紋頗憶呼盧袁彥道難邀罵坐灌將軍皆取  
其有  
也晚風落日元無主不惜清涼與子分

載酒無人過子雲掩關晝卧客書裙歌喉不共聽珠貫醉  
面何因作纈紋僧侶且啗香火社詩壇欲飲鵝鵝軍憑君  
徧遶湖邊寺漲綠晴來已十分

追和子由去歲試舉人洛下所寄詩暴雨初晴樓上



晚景

秋後風光雨後山  
滿城流水碧潺潺  
烟雲好處無多子  
及取昏鴉未到間

白汗翻漿午景前  
雨餘風物便蕭然  
應傾半熟鵝黃酒  
照見新晴水碧天

立秋日禱雨宿靈隱寺同周徐二令

百重堆案掣身閒  
一葉秋聲對榻眠  
牀下雪霜侵戶月  
枕中琴筑落階泉  
崎嶇世味嘗應遍  
寂寞山栖老漸便  
惟有憫農心尚在  
起占雲漢更茫然

病中遊祖塔院

紫李黃瓜邨路香  
烏紗白葛道衣涼  
閉門野寺松陰轉  
欹

枕風軒客夢長因病得閑殊不惡安心是藥更無方道人  
不惜堦前水借與匏樽自在嘗

孤山二詠

并引

孤山有陳時柏二株其一爲人所薪山下老人自  
爲兒已見其枯矣然堅悍如金石愈於未枯者僧  
志餘作堂於其側名之曰柏堂堂與白公居易竹  
閣相連屬余作二詩以紀之

柏堂

道人手種幾生前鶴骨龍姿尚宛然雙幹一先神物化九  
朝三見太平年忽驚華構依巖出乞與佳名到處傳此柏  
未枯君記取灰心聊伴小乘禪

竹閣

海山梵率雨茫然古寺無人竹滿軒  
白鶴不畱歸後語蒼龍猶是種時孫  
雨叢却似蕭郎筆千畝空懷渭上邨  
欲把新詩問遺像病維摩詰更無言

與述古自有美堂乘月夜歸

娟娟雲月稍侵軒  
歛歛星河半隱山  
魚鑰未收清夜永  
鳳簫猶在翠微間  
淒風瑟縮經絃柱  
香霧淒迷著髻鬟  
共喜使君能鼓樂  
萬人爭看火城還

登玲瓏山

何年偃立兩蒼龍  
瘦脊盤盤尚倚空  
翠浪舞翻紅檻稭  
白雲穿破碧玲瓏  
三休亭上工延月  
九折巖前巧貯風  
腳力

盡時山更好莫將有限趣無窮

宿九仙山

九仙謂左元放許邁王謝之流

風流王謝古仙真一去空山五百春  
玉室金堂餘漢士桃花流水失秦人  
因眠一榻香凝帳夢遶千巖冷逼身  
夜半老僧呼客起雲峯缺處湧冰輪

遊東西巖

卽謝安東山也

謝公含雅量世運屬艱難况復情所鍾感槩萃中年  
正賴絲與竹陶寫有餘歡常恐兒輩覺坐令高趣闕獨攜縹緲人  
來上東西山放懷事物外徙倚弄雲泉一旦功業成管  
絃復流言慷慨桓野王哀歌和清彈挽須起流涕始知使  
君賢意長日月促卧病已辛酸慟哭西州門往駕那復還

空餘行樂處古木昏蒼烟

初秋自徑山歸述古名飲介亭以病先起

西風初作十分涼喜見新橙透甲香遲暮賞心驚節物登  
臨病眼怯秋光慣眠處士雲菴裏倦醉佳人錦瑟傍猶有  
夢迴清興在卧聞歸路樂聲長

九日尋孫閣梨遂泛小舟至懃師院二首

白髮長嫌歲月侵病眸兼怕酒杯深南屏老宿閑相過東  
閣郎君懶重尋試碾露芽烹白雪休拈霜蘂嚼黃金扁舟  
又截平湖去欲訪孤山支道林

湖上青山翠作堆蔥蔥鬱鬱氣佳哉笙歌叢裏抽身出雲  
水光中洗眼來白足赤髭迎我笑批霜黃菊爲誰開明年

桑苧煎茶處憶著衰翁首重廻

皎然有九日與陸羽煎茶詩羽自號桑苧翁余來年

九日去此久矣

九日舟中望見有美堂上魯少卿飲處以詩戲之

指點雲間數點紅笙歌正擁紫髯翁誰知愛酒龍山客却  
在漁舟一葉中

西閣珠簾卷落暉水沉烟斷佩聲微遙知通德淒涼甚擁  
髻無言怨未歸

次韻周長官壽星院同餞魯少卿

瑠璃百頃水仙家風靜湖平響釣車寂歷疎松歆晚照伶  
俖寒蝶抱秋花困眠不覺依蒲褐歸路相將踏桂華更著  
綸巾披鶴氅他年應作畫圖誇

述古以詩見責屢不赴會復次前韻

我生孤僻本無隣  
老病年來益自珍  
肯對紅裙辭白酒  
但愁新進笑陳人  
北山怨宦休驚夜  
南畝巾車欲及春  
多謝清詩屢推轂  
豈膏那解轉方輪

來詩有雲霄滿輪之句

書雙竹湛師房

暮鼓朝鐘自擊撞  
閉門孤枕對殘缸  
白灰旋撥通紅火  
卧聽蕭蕭雪打牕

寶山新開徑

藤梢橘刺元無路  
竹杖稜鞋不用扶  
風自遠來聞語笑  
水分流處見江湖  
回觀佛國青螺髻  
踏遍仙人碧玉壺  
野客歸時山月上  
棠梨葉戰暝禽呼

和錢安道寄惠建茶

我官于南今幾時嘗盡溪茶與山茗胸中似記故人面口  
不能言心自省爲君細說我未暇試評其畧差可聽建溪  
所產雖不同一一天與君子性森然可愛不可慢骨清肉  
膩和且正雪花雨脚何足道啜過始知真味永縱復苦硬  
終可錄汲黯少慙寬饒猛艸茶無賴空有名高若妖邪次  
頑曠體輕雖復強浮泛性滯偏工嘔酸冷其間絕品豈不  
佳張禹縱賢非骨鯁葵花玉韉不易致道路幽險隔雲嶺  
誰知使者來自西間緘磊落收百餅嗅香嚼味本非別透  
紙自覺光炯炯粗糲團鳳友小龍奴隸目注臣雙井收藏  
愛惜待佳客不敢包裝鑽權倖此詩有味君勿傳空使時



東坡詩選  
人怒生癭

雪後至臨平與柳子玉同至僧舍見陳尉列

落帆古戍下積雪高如丘強邀詩老出疎聶散颼颼僧房  
有宿火手足漸和柔靜士素寡言相對自忘憂銅鑪擢烟  
穗石鼎浮霜漚我行雖有程坐穩且復留大哉天地間此  
生得浮遊

除夜野宿常州城外二首

行歌野哭兩堪悲遠火低星漸向微病眼不眠非守歲鄉  
音無伴苦思歸重衾腳冷知霜重新沐頭輕感髮稀多謝  
殘燈不嫌客孤舟一夜許相依

南來三見歲云徂直恐終身走道塗老去怕看新曆日退

歸擬學舊桃符烟花已作青春意霜雪偏尋病客鬚但把  
窮愁博長健不辭醉後飲屠蘇

虎丘寺

入門無平田石路穿細嶺陰風生澗壑古木翳潭井湛盧  
誰復見秋水光耿耿鐵花秀巖壁殺氣噤蛙黾幽幽生公  
堂左右立頑礦當年或未信異類服精猛胡爲百歲後仙  
鬼互馳騁窈然畱新詩讀者爲悲哽東軒有佳致雲水麗  
千頃熙熙覽生物春意破淒冷我來屬無事暖日相與永  
喜鵲翻初旦愁鴛蹲落景坐見漁樵還新月溪上影悟彼  
良自怡歸田行可請

常潤道中有懷錢塘寄述古三首

艸長江南鷺亂飛年來事事與心違  
花開後院還空落燕入華堂怪未歸  
世上功名何日是樽前點檢幾人非  
去年柳絮飛時節記得金籠放雪衣

杭人以放鴿爲太守壽

國艷天饒酒半酣去年同賞寄僧簷  
但知撲撲晴香軟誰見森森曉態嚴  
穀雨共驚無幾日蜜蜂未許輒先甜  
應須火急回征棹一片辭枝可得黏

惠山泉下土如濡陽羨溪頭米勝珠  
賣劍買牛吾欲老穀雞爲黍子來無地  
偏不信容高蓋俗儉真堪着腐儒  
莫怪江南苦畱滯經營身計一生迂

同柳子玉遊鶴林招隱醉歸呈景純

花時臘酒照人光歸路春風灑面涼  
劉氏宅邊霜竹老戴

公山下野桃香巖頭正練兼天靜泉底真珠濺客忙安得道人攜笛去一聲吹裂翠崖岡

柳子玉亦見和因以送之兼寄其兒子璋道人

不羨腰金照地光  
整時假面弄西涼  
晴牕嚙日肝腸暖  
古廟朝真屨袖香  
說靜故知猶有動  
無閑底處更求忙  
先生官罷乘風去何用  
區區賦陟岡

金山寺與柳子玉飲大醉卧寶覺禪榻夜分方醒書其壁

惡酒如惡人相攻  
劇刀箭頽然一榻上  
勝之以不戰  
詩翁氣雄拔  
禪老語清軟  
我醉都不知  
但覺紅綠眩  
醉時江月墮  
撼撼風響變  
惟有一龕燈  
二豪俱不見

大風留金山兩日

塔上一鈴獨自語明日顛風當斷渡潮來白浪打蒼崖倒  
射軒牕作風雨龍驤萬斛不敢過漁艇一葉從掀舞細思  
城市有底忙却笑蛟龍爲誰怒無事久留僮僕怪此風聊  
得妻孥忤滿山道人獨何事夜半不眠聽粥鼓

遊鶴林招隱二首

郊原雨初霽春物有餘妍古寺滿修竹溪林聞杜鵑睡餘  
柳花墮目眩山櫻然西牕有病客危坐看香烟

行歌白雲嶺坐咏修竹林風輕花自落日薄山半陰澗艸  
誰復識聞香杳難尋時見城市人幽居惜未濱

書普慈長老壁

志誠

普慈寺後千竿竹醉裏曾看碧玉椽倦客再遊行老矣高  
僧一笑故依然久叅白足知禪味苦厭黃公鳥名聒畫眠惟  
有兩株紅杏葉晚來猶得向人妍

留別金山寶覺圓通二長老

沐罷巾冠快晚涼睡餘齒頰帶茶香艤舟北岸何時渡  
睇髮東軒未肯忙康濟此身殊有道治醫外物本無方  
風流二老長還在願我歸期尚未茫

無錫道中賦水車

翻翻聯聯銜尾鴉犂犂确确蛻骨蛇分畦翠浪走雲陣刺  
水綠鉞抽稻牙洞庭五月欲飛沙鼉鳴窟中如打衙天公  
不見老農泣與取阿香推雷車

次韻沈長官三首

家山何在兩忘歸  
杯酒相逢慎勿違  
不獨飯山嘲我瘦  
也應糠覈怪君肥

男婚已畢女將歸  
累盡身輕志莫違  
誰道山中食無  
池清水自生肥

造物知吾久念歸  
似憐衰病不相違  
風來震澤帆初飽  
雨入松江水漸肥

過永樂文長老已卒

初驚鶴瘦不可識  
旋覺雲歸無處尋  
三過門聞老病死  
一彈指頃去來今  
存亡慣見渾無淚  
鄉井難忘尚有心  
欲向錢塘訪圓澤  
葛洪川畔待秋深

捕蝗至浮雲嶺山行疲苦有懷子由弟

霜風漸欲作重陽  
熠熠溪邊野菊黃  
久廢山行疲弊尚  
能邨醉舞淋浪  
獨眠林下夢魂好  
回首人間憂患長  
殺馬毀車從此逝  
子來何處問行藏

與毛令方尉遊西菩提寺二首

推擠不去已三年  
魚鳥依然笑我頑  
人未放歸江北路  
天教看盡浙西山  
尚書清節衣冠後  
處士風流水石間  
一笑相逢那易得  
數詩狂語不須刪

路轉山腰足未移  
水清石瘦便能奇  
白雲自古東西嶺  
明月誰分上下池  
黑黍黃粱初熟後  
朱柑綠橘半甜時  
人生此樂須天賦  
莫遣兒曹取次知



聽賢師琴

大絃春溫和且平小絃廉折亮以清平生未識宮與角但聞牛鳴盎中雉登木門前剝啄誰扣門山僧未聞君勿瞋歸家且覓千斛水淨洗從來箏笛耳

單同年求德興俞氏聚遠樓詩三首

雲山烟水苦難親野艸幽花各自春賴有高樓能聚遠一時收拾與閑人

無限青山散不收雲奔浪卷入簾鉤直將眼力爲疆界何啻人間萬戶侯

聞說棲居似地仙不知門外有塵寰幽人隱几寂無語心在飛鴻滅沒間

平山堂次王居卿祠部韻

高會日陪山簡醉狂言屢發次公醒酒如人面天然白山  
向吾曹分外青江上飛雲來北固檻前修竹憶南屏六朝  
興廢餘丘隴空使奸雄笑寧馨

次韻陳海州乘槎亭

人事無涯生有涯逝將歸釣漢江槎乘桴吾欲從安石道  
世誰能識子嗟日上紅波浮碧巘潮來白浪卷晴沙清談  
美景雙奇絕不覺歸鞍帶月華

雪夜書北臺壁二首

黃昏猶作雨纖纖夜靜無風勢轉嚴但覺衾裯如潑水不  
知庭院已堆鹽五更曉色來書幌半夜寒聲落畫簷試掃

北臺看馬耳未隨埋沒有雙尖

城頭初日始翻鴉陌上晴泥已沒車  
凍合玉樓寒起粟光搖銀海眩生花  
遺蝗入地應千尺宿麥連雲有幾家  
老病自嗟詩力退空吟冰柱憶劉叉

謝人見和前篇二首

已分酒盃欺淺懦敢將詩律鬪深澁  
嚴漁叢句好應須畫柳絮才高不道  
鹽敗屨尚存東郭指飛花又舞謫仙  
簷書生事業真堪笑忍凍孤吟筆退尖

九陌淒風戰齒牙銀杯逐馬帶隨車  
也知不作堅牢玉無奈能開頃刻花  
得酒強歡愁底事閉門高卧定誰家  
臺前日暖君須愛冰下寒魚漸可叉

惜花

吉祥寺中錦千堆

錢塘花最盛處

前年賞花真盛哉道人勸我清

明來腰鼓百面如春雷打徹涼州花自開沙河塘上插花  
回醉倒不覺吳兒吟豈知如今雙鬢催城西古寺沒蒿萊  
有僧閉門手自栽千枝萬葉巧剪裁就中一叢何所似馬  
蹄盤成金縷杯而我食菜方清齋對花不飲花應待夜來  
雨雹如李梅紅殘綠暗吁可哀

孔長源挽詞

小堰門頭柳繫船吳山堂上月侵筵潮聲夜半千巖響詩  
句明朝萬口傳

長源自越過杭夜飲有美堂上聯句長源詩云天目遠隨雙鳳落海門遙望兩潮趨

一座

豈意日斜庚子後忽驚歲在己辰年佳城一閉無窮

事南望題詩淚洒牋

懷西湖寄晁美叔同年

西湖天下景游者無愚賢  
淡淺隨所得誰能識其全  
嗟我本狂直蚤爲世所捐  
獨專山水樂付與寧非天  
三百六十寺幽尋遂窮年  
所至得其妙心知口難傳  
至今清夜夢耳日餘芳鮮  
君持使者節風采爍雲烟  
清流與碧巖安肯爲君妍  
胡不屏騎從暫借僧榻眠  
讀我壁間詩清涼洗煩煎  
策杖無道路直造意所便  
應逢古漁父葦間自延緣  
問道若肯得買魚勿論錢

和蔣夔寄茶

我生百事常隨緣四方水陸無不便  
扁舟渡江適吳越三

年飲食窮芳鮮金盞玉脔飯炊雪海螯江柱初脫泉蔭風  
飽食甘寢罷一甌花乳浮輕圓自從捨舟入東武沃野便  
到桑麻川翦毛胡羊大如馬誰記鹿角腥盤筵廚中爇栗  
埋飯甕大杓更取酸生涎柘羅銅碾棄不用脂麻白土須  
盆研故人猶作舊眼看謂我好尚如當年沙溪北苑強分  
別水脚一絲誰爭先清詩兩幅寄千里紫金百餅費萬錢  
吟哦烹噉兩奇絕只恐偷乞煩封纏老妻稚子不知愛一  
半已入蔬鹽煎人生所遇無不可南北嗜好知誰賢死生  
禍福久不擇更論甘苦爭媿妍知君窮旅不自釋因詩寄  
謝聊相鐫

和文與可洋川園池

湖橋

朱欄画柱照湖明白葛烏紗曳履行橋下龜魚晚無數識  
君拄杖過橋聲

橫湖

貪看翠蓋映紅粧不覺湖邊一夜霜卷却天機雲錦段從  
教匹練寫秋光

書軒

雨昏石硯寒雲色風動牙籤亂葉聲庭下已生書帶艸使  
君疑是鄭康成

水池

不嫌冰雪遠池看誰似詩人巧耐寒記取羲之洗硯處碧

瑠璃下黑蛟螭

竹塢

晚節先生道轉孤  
歲寒惟有竹相娛  
蠶才杜牧真堪笑  
喚作軍中十萬夫

望雲樓

陰晴朝暮幾回新  
已向空虛付此身  
出本無心歸亦好  
白雲還似望雲人

溪光亭

決去湖波尚有情  
却隨初日動簷楹  
溪光自古無人畫  
憑仗新詩與寫成

蒨菴亭



日日移牀趁下風清香不盡思何窮若爲化作龜千歲巢  
向田田亂葉中

南園

不種天桃與綠楊使君應欲候農桑春畦雨過羅繞膩夏  
隴風來餅餌香

寄題刁景純藏春塢

白首歸來種萬松待看千尺舞霜風年拋造物陶甄外春  
在先生杖屨中楊柳長齊低戶暗櫻桃爛熟滴階紅何時  
却與徐元直共訪襄陽龐德公

次韻劉貢父李公澤見寄

白髮相望兩故人眼看時事幾番新曲無和者應思郢論

少卑之且借秦歲惡詩人無好語

公釋來詩有道  
失中饑之狀

夜長鰥

守向誰親

貢父近  
喪偶

少思多睡無如我鼻息雷鳴撼四鄰

### 寄黎眉州

膠西高處望西川應在孤雲落照邊瓦屋寒堆春後雪峨

眉翠掃雨餘天治經方笑春秋學好士今無六一賢

君以  
春秋

受知於歐陽文忠公  
公自號六一居士

且待淵明賦歸去共將詩酒趁流年

七月五日

何處覓新秋蕭然北臺上秋來未云幾風月已清亮雲間  
聳孤翠林表浮遠漲新粼漸堪剝晚瓜猶可餉西風送落  
日萬竅含悽悵念當急行樂白髮不汝放

除夜大雪留濰州元日早晴遂行中途雪復作

除夜雪相留元日晴相送東風吹宿酒瘦馬兀殘夢葱隴  
曉光開旋轉餘花弄下馬成野酌佳哉誰與共須臾晚雲  
合亂灑無缺空鵝毛垂馬鬣自怪騎白鳳三年東方早逃  
戶連欹棟老農釋耒歎淚入饑腸痛春雪雖云晚春麥猶  
可種敢怨行役勞助爾歌飯甕

書韓幹牧馬圖

南山之下汧渭之間想見開元天寶年八坊分屯隘秦川  
四十萬正如雲烟騅駟駉騊驪騶驪白魚赤兔新皇轡龍  
顧鳳頸停且妍奇姿逸德隱驚頑碧眼胡兒手足鮮歲時  
翦刷供帝閑柘袍臨池侍三千紅粧照日光流澗樓下玉  
螭吐清寒往來蹙踏生飛漪舉工祇筆和朱鉛先生曹霸

弟子韓厓馬多肉尻雕圓肉中畫骨誇尤難金羈玉勒繡  
羅鞍鞭箠刻烙傷天全不如此同近自然平沙細艸荒芊  
綿驚鴻脫兔爭後先王良挾策飛上天何必俯首伏短轅  
和李邦直沂山祈雨有感

高田生黃埃下田生蒼耳蒼耳亦已無更問麥有幾蛟龍  
睡足亦解慙二麥枯時雨如洗不知雨從何處來但聞呂  
梁百步聲如雷試上城南望城北際天菽粟青如堆饑火  
燒腸作牛吼不知待得秋成否半年不雨坐荒墟共怨天  
公不怨龍今朝一雨聊自贖龍神社鬼各言功無功日盜  
太倉穀嗟我與龍同此責勸農使者不汝容因君作詩先  
自効

次韻荅邦直子由

簿書顛倒夢魂間，知我疎慵肯見原。  
閑作閉門僧舍冷，病聞吹枕海濤喧。  
忘懷杯酒逢人共，引睡文書信手翻。  
欲吐狂言喙三尺，怕君瞋我却須吞。

邦直屢以此見戒

君雖爲我此遲留，別後淒涼我已憂。  
不見便同千里遠，退歸終作十年遊。  
恨無楊子一區宅，懶卧元龍百尺樓。  
聞道鵝鴻蒲臺閣，網羅應不到沙鷗。

次韻呂梁仲屯田

雨葉風花日夜稀，一杯相屬竟何時。  
空虛豈敢酬瓊玉，枯朽猶能出菌芝。  
門外呂梁從迅急，胸中雲夢自逶遲。  
待君筆力追靈運，莫負南臺九日期。

代書荅梁先

此身與世真悠悠蒼顏華髮誰汝留強名太守古徐州忘  
歸不如楚沐猴魯人豈獨不知丘藉躋夫子無罪尤異哉  
梁子清而修不遠千里從我游瞭然正色懸雙眸世之所  
馳子獨否一經通明傳節侯小楷精絕規摹歐

梁生學歐陽公書

我衰廢學懶且媮畏見問事賈長頭別來紅葉黃花秋夜  
夢見之起坐愁遺我駸石盆與甌黑質白章聲琳球謂言  
山石出澗溝追琢尚可王公差感子佳意能無酬反將木  
瓜報珍投學如富賈在博收仰取俯拾無遺籌道大如天  
不可求修其可見致其幽願子篤實慎勿浮發憤忘食樂  
忘憂

韓幹馬十四疋

二馬並驅攢八蹄二馬宛頸驥尾齊一馬任前雙舉後一馬却避長鳴嘶老髯奚官騎且顧前身作馬通馬語後有八匹飲且行微流赴吻若有聲前者旣濟出林鶴後者欲涉鶴俛啄最後一匹馬中龍不嘶不動尾搖風韓生畫馬真是馬蘓子作詩如見畫世無伯樂亦無韓此詩此畫誰當看

哭刁景純

讀書想前輩每恨生不早紛紛少年場猶得見此老此老如松柏不受霜雪槁直從毫末中自養到合抱宏材乏近用千歲自枯倒文章餘正始風節貫華皓平生爲人耳自

爲薄如縞是非雖難齊反覆看愈好前年旅吳越把酒慶  
壽考扣門無晨夜百過迹未掃但知從德公未省厭丘嫂  
別時公八十後會知難保昨日故人書連年喪公媼景純妻先  
亡傷心范橋水漾漾舞寒藻華堂不見人瘦馬空戀阜我  
欲江東去匏樽酌行潦鏡湖無賀監慟哭稽山道忍見萬  
松岡荒池沒秋艸

### 春菜

蔓菁宿根已生葉韭牙戴土拳如蕨爛烝香薺白魚肥碎  
點青蒿涼餅滑宿酒初消春睡起細履幽畦採芳辣茵陳  
甘菊不負渠膾縷堆盤纖手抹北方苦寒今未已雪底菠  
薐如鐵甲豈如吾蜀富冬蔬霜葉露牙寒更茁久拋松葛



猶細事苦筍江豚那忍說明年投効徑須歸莫待齒搖并髮脫

讀孟郊詩

夜讀孟郊詩細字如牛毛寒燈照昏花佳處時一遭孤芳擢荒穢苦語餘詩騷水清石鑿鑿湍激不受篙初如食小魚所得不償勞又似煮彭蠡竟日嚼空螯要當鬪僧清未足當韓豪人生如朝露日夜火消膏何苦將兩耳聽此寒蟲號不如且置之飲我玉卮醪

我憎孟郊詩復作孟郊語饑腸自鳴喚空壁轉饑鼠詩從肺腑出出輒愁肺腑有如黃河魚出膏以自煮尚愛銅斗歌鄙俚頗近古桃弓射鴨罷獨速短策舞不憂踏船翻踏

浪不踏土吳姬霜雪白赤脚浣白紵嫁與踏浪兒不識離  
別苦歌君江湖曲感我長羈旅

夜飲次韻畢推官

簿書叢裏過春風酒聖時時且復中紅燭照庭嘶驤裊黃  
鷄吹曉唱玲瓏老來漸減金釵興醉後空驚玉筯工月未  
上時應早散免教壑谷問吾公

李仲謀家有周昉畫背面欠仲內人極精戲作此詩  
淡宮無人春日長沉香亭北百花香美人睡起薄梳洗燕  
舞鶯啼空斷腸畫工欲畫無窮意背立東風初破睡若教  
回首却嫣然陽城下蔡俱風靡杜陵饑客眼常寒蹇驢破  
帽隨金鞍隔花臨水時一見只許腰肢背後看心醉歸來

茅屋底方信人間有西子君不見孟光舉案與眉齊何曾  
背面傷春啼

雨中過舒教授

疎疎簾外竹瀏瀏竹間雨牕扉靜無塵几硯寒生霧美人  
樂幽獨有得緣無慕坐依蒲褐禪起聽風颭語客來淡無  
有灑掃涼冠屨濃茗洗積昏妙香淨浮慮歸來北堂闇一  
一微螢度此生憂患中一餉安閑處飛鷺悔前笑黃犬悲  
晚悟自非陶靖節誰識此間趣

次韻荅舒教授觀余所藏墨

異時長笑王會稽野鷺臙腥汗刀几莫年却得庾安西自  
厭家雞題六紙二子風流冠當代顧與兒童爭愠喜秦王

十八已龍飛嗜好晚將虵蚓比我生百事不挂眼時人繆  
說云工此世間有癖念誰無傾身障麗尤堪鄙一生當著  
幾兩屐定心肯爲微物起此墨足支三十年但恐風霜侵  
髮齒非人磨墨磨人餅應未罄嚙先恥逝將振衣歸故  
國數畝荒園自鋤理作書寄君君莫笑但覓來禽與青李  
一螺點漆便有餘萬竈燒松何處使君不見永寧第中擣  
龍麝列屋閑居清且美倒葷連眉秀嶺浮雙鴉畫鬢香雪  
委時聞五斛賜蛾綠不惜黃金求獺髓聞君此詩當大笑  
寒牕冷硯冰生水

荅仲屯田次韻

秋來不見漢陂岑千里詩盟忽重尋大木百圍生遠籟朱

絃三歎有餘音清風卷地收殘暑素月流天掃積陰欲遣  
何人賡絕唱滿堦桐葉候蟲吟

次韻荅王定國

每得君詩如得書宣心寫妙書不如眼前百種無不有知  
君一以詩驅除傳聞都下十日雨青泥沒馬街生魚舊雨  
來人今不來油然獨酌卧清虛堂我雖作郡古云樂山川  
信美非吾廬願君不廢重九約念此衰冷勤呵噓

中秋見月寄子由

此詩應屬次公作坊本佚刻

西風吹暑天益高明月耿耿分秋毫彭城閉門青嶂合坐  
聽百步鳴飛霽史君攜客登燕子月色著人如著水筵前  
不設鼓與鐘處處笛聲相應起浮雲卷盡流金丸戲馬臺

西山鬱蟠杯中淥酒一時盡衣上白露三更寒扁舟明日  
浮古汴回首逡巡陵谷變河吞巨野入長淮城沒黃流只  
三板明年築城城似山伐木爲堤堤更壑黃樓未成河已  
退空有遺跡令人看城頭看月應更好河流湫處今生艸  
子孫免被魚鼈食歌舞聊寬使君老南都從事老更貧羞  
見青天月照人飛鶴投籠不能出曾是彭城坐中客

和子由中秋見月

明月未出羣山高端光千丈生白毫一杯未盡銀闕滿亂  
雲脫壞如崩濤誰爲天公洗眸子應費明河千斛水遂令  
冷看世間人照我湛然心不起西南火星如彈丸角尾奕  
奕蒼龍蟠今宵注眼看不見更許螢火爭清寒何人戩舟

臨古汴千燈夜作魚龍變曲折無心逐浪花低昂赴節隨

歌板

是夜賈客舟中放永燈

青燐滅沒轉前山浪颭風迴豈復堅明

月易低人易散歸來呼酒更重看堂前月色愈清好咽咽

寒螢鳴露艸卷簾推戶寂無人牕下呶啞惟楚老

近有一孫名楚

老南都從事莫羞貧對月題詩有幾人明朝人事隨日出

恍然一夢瑤臺客

### 次韻荅頓起

挽袖推腰踏破紳舊聞攜手上天門相逢應覺聲容似欲

話先驚歲月奔新學已皆從許子諸生猶自畏何蕃殿廡

直宿真如夢猶記憂時策萬言

頓君及第時余爲殿後編排官見其荅策語頗直其

後與子由試舉人西京既罷同登嵩山絕頂嘗見其唱酬詩十餘首頓詩中及之

九月黃樓作

去年重陽不可說南城夜半千漚發水穿城下作雷鳴泥  
滿城頭飛雨滑黃花白酒無人問日暮歸來洗韉轡豈知  
還復有今年把盞對花容一呷莫嫌酒薄紅粉陋終勝泥  
中事缺鍾黃樓新成壁未乾青河已落霜初殺胡來白露  
如細雨南山不見于尋剎樓前便作海茫茫樓下空聞舫  
鴉軋薄寒中人老可畏熱酒澆腸氣先壓烟消日出見漁  
邨遠水鱗鱗山鬱鬱詩人猛士雜龍虎

坐客三十餘人多知名之士楚

舞吳歌亂鵝鴨一盃相屬君勿辭此景何殊汎清雪

張安道見示近詩

人物一衰謝微言難重尋殷勤永嘉末復聞正始音清談



未足多感時意殊深少年有奇志欲和南風琴荒林蜩螗  
亂廢沼蛙蝸淫遂欲掩兩耳臨文但噫齋蕭然王郎子來  
自緱山陰其婿王  
鞏攜來云見浮丘伯吹簫明月岑遺聲落淮泗  
蛟鼉爲悲吟願公正王度祈招繼惜惜

次韻王鞏顏復同汎舟

沈郎清瘦不勝衣邊老便便帶十圍蹊蹠身輕山上走謹  
呼船重醉中歸舞腰似雪金釵落談辨如雲玉塵麾憶在  
錢塘正如此回頭四十二年非

百步洪二首

并序

王定國訪余於彭城一日棹小舟與顏長道攜盼  
英卿三子游泗水北上聖女山南下百步洪吹笛

飲酒乘月而歸余時以事不得往夜著羽衣佇立  
於黃樓上相視而笑以爲李太白死世間無此樂  
三百餘年矣定國旣去逾月復與參寥師放舟洪  
下追懷曩游已爲陳迹喟然而嘆故作二詩一以  
遺參寥一以寄定國且示顏長道舒堯文邀同賦  
云

長洪斗落生跳波輕舟南下如投梭水師絕叫鳧鴈起亂  
石一線爭礮磨有如兔走鷹隼落駿馬下注千丈坡斷絃  
離柱箭脫手飛電過隙珠翻荷四山眩轉風掠耳但見流  
沫生千渦嶮中得樂雖一快何異水伯夸秋河我生乘化  
日夜逝坐覺一念逾新羅紛紛爭奪醉夢裏豈信荊棘埋

銅駝覺來俯仰失千劫回視此水殊委蛇君看岸邊蒼石  
上古來箇眼如蜂窠但應此心無所住造物雖駛如余何  
回船上馬各歸去多言嘵嘵師所呵

佳人未肯回秋波幼與欲語防飛梭輕舟弄水買一笑醉  
中蕩槳肩相磨不似長安閭里俠貂裘夜走臙脂坡獨將  
詩句擬鮑謝涉江共採秋江荷不知詩中道何語但覺兩  
頰生微渦我時羽服黃樓上坐見織女初斜河歸來笛聲  
滿山谷明月正照金叵羅奈何捨我入塵土擾擾毛羣欺  
卧駝不念空齋老病叟退食誰與同委蛇時來洪上看遺  
跡忍見履齒青苔窠詩成不覺淚雙下悲吟相對惟羊何  
欲遣佳人寄錦字夜寒手冷無人呵

人日獵城南會者十人以身輕一鳥過槍急萬人呼  
爲韻軾得鳥字

兒童笑使君憂慍常悄悄誰拈白接離令跨金騾裹東風  
吹溼雪手冷怯清曉忽發兩鳴髀相趁飛盡小放弓一長  
嘯目送孤鴻矯吟詩忘鞭轡不語頭自掉歸來仍脫粟鹽  
鼓煮芹蓼何似雷將軍兩眼霜鵲皎黑頭已爲將百戰意  
未了馬上倒銀瓶得兔不暇燎少年負奇志踴躍百憂繞  
回首英雄人老死已不少青春還一夢餘年真過鳥莫上  
呼鷹臺平生笑劉表

將官雷勝得過字代作

胡騎入雲中急烽連夜過短刀穿虜陣濺血貂裘浣一來

輦轂下愁悶惟欲卧今朝從公獵稍覺天宇大一雙鐵絲  
箭未發手先睡射殺霜毛狐腰間餘一箇

雪齋

杭僧法言作  
雪山于齋中

君不見蛾眉山西雪千里北望成都如井底春風百日吹  
不消五月行人如凍蟻紛紛市人爭奪中誰信言公似贊  
公人間熱惱無處洗故向西齋作雪峯我夢扁舟適吳越  
長廊靜院燈如月開門不見人與牛惟見空庭滿山雪言有  
詩見寄云郵下  
閑看水牯牛

月下與客飲酒杏花下

杏花飛簾散餘春明月入戶尋幽人褰衣步月踏花影爛  
如流水涵青蘋花間置酒清香發爭挽長條落香雪山城

薄酒不堪飲勸君且吸盃中月洞簫聲斷月明中惟憂月  
落酒盃空明朝卷地春風惡但見綠葉棲殘紅

罷徐州往南京馬上走筆寄子由

吏民莫扳援歌管莫凄咽吾生如寄耳寧獨爲此別別離  
隨處有悲惱緣愛結而我本無恩此涕誰爲設紛紛等兒  
戲鞭輻遭割截道邊雙石人幾見太守發有知當解笑撫  
掌冠纓絕

父老何自來花枝裊長紅洗瓊拜馬前請壽使君公前年  
無使君魚鼈化兒童舉鞭謝父老正坐使君窮窮人命公  
惡所向招災凶水來非吾過去亦非吾功

與秦太虛參寥會於松江而關彥長徐安中適至公

韻得風字二首

吳越溪山興未窮，又扶衰病過垂虹。  
浮天自古東南水，送客今朝西北風。  
絕境自忘千里遠，勝遊難復五人同。  
舟師不會留連意，擬看斜陽萬頃紅。

二子緣詩老更窮，人間無處吐長虹。  
平生睡足連江雨，盡日舟橫擘岸風。  
人笑年來三黜慣，天教我輩一尊同。  
知君欲寫長相憶，更送銀盤尾鬣紅。

丁公默送螭蟀

溪邊石蟹小如錢，喜見輪囷赤玉盤。  
半殼含黃宜點酒，兩螯斫雪勸加餐。  
螯珍海錯聞名久，怪雨腥風入座寒。  
堪笑吳興饒太守，一詩換得兩尖團。

泛舟城南會者五人分韻賦詩

紫蟹鱸魚賤如土得錢相付何曾數  
碧筍時作象鼻灣白  
酒微帶荷心苦運肘風生看斫脰  
隨刀雪落驚飛縷不將  
醉語作新詩飽食應慙腹如鼓

與王郎昆仲及兒子邁遶城觀荷花登岷山亭晚入  
飛英寺分韻

昨夜雨鳴渠曉來風襲月蕭然欲秋意  
溪水清可漱環城  
三十里處處皆佳絕蒲蓮浩如海時見舟一葉此間真避  
世青弱低白髮相逢欲相見已逐鷺鷥沒

清風定何物可愛不可名所至如君子  
草木有嘉聲我行  
本無事孤舟任斜橫中流自偃仰適與風相迎  
舉杯屬浩



湧樂此兩無情歸來兩溪澗雲水夜自明

與胡祠部遊法華山

陂湖欲盡山爲界始見寒泉落高派道人未放泉出山曲  
折虛堂寫清快使君年老尚兒戲綠棹紅船舞澎湃一笑  
翻杯水潑裙餘懽濯足波生隘長松攬天龍起立蒼藤倒  
谷雪崩壞仰穿蒙密得清曠一覽震澤吁可怪誰云四萬  
八千頃渺渺東盡目所矚歸途十里盡風荷清唱一聲聞  
露薤是日樂工有  
作此聲者嗟余小小慕真隱白髮青衫天所械忽  
逢佳士與名山何異枯楊便馬疥君猶鸞鶴偶飄墮六翮  
如雲豈長鑠不將新句紀茲遊恐負山中清淨債

初到黃州

自笑平生爲口忙，老來事業轉荒唐。  
長江遶郭如魚美，好竹連山覺筍香。  
逐客不妨員外置，詩人例作水曹郎。  
只慙無補絲毫事，尚費官家壓酒囊。

檢校官例折支多得退酒袋

### 定惠院寓月夜偶出

幽人無事不出門，偶逐東風轉良夜。  
參差玉宇飛木末，繚繞香烟來月下。  
江雲有態清自媚，竹露無聲浩如瀉。  
已驚弱柳萬絲垂，尚有殘梅一枝亞。  
清詩獨吟還自和，白酒已盡誰能借。  
不辭青春忽忽過，但恐懽意年年謝。  
自知醉耳愛松風，會揀霜林結茅舍。  
浮浮大甌長炊玉，溜溜小槽如壓蔗。  
飲中真味老更濃，醉裏狂言醒可怕。  
但當謝客對妻孥，倒冠落佩從嘲罵。

次韻前篇

去年花落在徐州對月酣歌美清夜

去年徐州花下對月與張君厚王子忠兄

弟飲作蘋字韻詩

今年黃州見花發小院閉門風露下萬事如花

不可期餘年似酒那禁瀉憶昔還鄉泝巴峽落帆樊口

樊口

在黃州南岸

高桅亞長江衮衮空自流白髮紛紛寧少借竟無

五畝繼沮溺空有千篇陵鮑謝至今歸計負雲山未免孤

衮眠客舍少年辛苦真食蓼老景清閑如啖蔗饑寒未至

且安居憂患已空猶夢怕穿花踏月飲邨酒免使醉歸官

長罵

寓居定惠院之東雜花滿山有海棠一株土人不知

其貴也

江城地瘴蕃草木只有名花苦幽獨嫣然一笑竹籬間桃  
李漫山總麝俗也知造物有深意故遣佳人在空谷自然  
富貴出天姿不待金盤薦華屋朱唇得酒暈生臉翠袖卷  
紗紅映肉林深霧暗曉光遲日暖風輕春睡足雨中有淚  
亦淒愴月下無人更清淑先生食飽無一事散步逍遙自  
捫腹不問人家與僧舍拄杖敲門看修竹忽逢絕艷照衰  
朽歎息無言揩病目陋邦何處得此花無乃好事移西蜀  
寸根千里不易到銜子飛來定鴻鵠天涯流落俱可念爲  
飲一樽歌此曲明朝酒醒還獨來雪落紛紛那忍觸

遊武昌寒溪西山寺

連山蟠武昌翠木蔚樊口我來已百日欲濟空搔首坐看

鷗鳥泛夢逐磨麤走今朝橫江來一葦寄衰朽高談破巨  
浪飛屨輕重阜去人曾幾何絕壁寒溪吼風泉兩部樂松  
竹三益友徐行欣有得芝朮在蓬莠西上九曲亭衆山皆  
培塿却看江北路雲水渺何有離離見吳宮莽莽見楚數  
空傳孫郎石無復陶公柳爾來風流人惟有漫郎叟買田  
吾已決乳水況宜酒所須修竹林溪處安非日相將踏勝  
絕更聚三日糗

遷居臨臯亭

我生天地間一蟻寄大磨區區欲右行不救風輪左雖云  
走仁義未免違寒餓米有危炊針鹽無穩坐豈無佳山  
水借眼風雨過歸田不待老勇決凡幾調幸茲廢秦餘疲

馬解鞍馱全家古江驛絕境天爲破饑貧相乘除未見可  
弔賀澹然無憂樂苦語不成些

曉至沙巴河口迎子由

去年御史府舉動觸四壁幽幽百尺井仰天無一席隔牆  
聞歌呼自恨計之失留詩不忍寫苦淚漬紙筆餘生復何  
幸樂事有今日江流鏡面靜烟雨輕羃羃孤舟如鳬鷖點  
破千頃碧聞君在磁湖欲見隔咫尺朝來好風色旗尾西  
北擲行當中流見笑眼青光溢此邦疑可老修竹帶泉石  
欲買柯氏林茲謀待君必

次韻荅子由

平生弱羽寄衝風此去歸飛識所從好語似珠穿一一妄

心如膜退重重山僧有味寧知子  
瀧吏無言只笑儂尚有讀書清淨業未容春睡敵千鍾

東坡

并序

余至黃二年日以困匱郡人馬正卿哀余乏食爲於郡中請故營地數十畝使得躬耕其中地旣久荒爲茨棘瓦礫之場而歲又大旱墾闢之勞筋力殆盡釋耒而歎乃作是詩自愍其勤庶幾來歲之入以忘其勞焉

廢壘無人顧頽垣滿蓬蒿誰能捐筋力歲晚不償勞獨有孤旅人天窮無所逃端來拾瓦礫歲旱土不膏崎嶇艸棘中欲刮一寸毛喟焉釋耒歎我廩何時高

荒田雖浪莽高庠各有適下隰種秔社東原時棗栗江南  
有蜀士桑果已許乞好竹不難栽但恐鞭橫逸仍須卜佳  
處規以安我室家童燒枯艸走報暗井出一飽未敢期瓢  
飲已可必

自昔有微泉來從遠嶺背穿城過聚落流惡壯蓬艾去爲  
荆氏陂十畝魚鰕會歲旱泉亦竭枯萍粘破塊昨夜南山  
雲雨到一犁外泫然尋故瀆知我理荒蒼泥芹有宿根一  
寸嗟獨在雪芽何時動春鳩行可膾

蜀人貴芹芽舊  
雜鳩肉作之

種稻清明前樂事我能數毛空暗春澤針水聞好語

蜀人  
以細

雨爲雨毛細初生時  
農相語稻針水矣

分秧及初夏漸喜風葉舉月明看露

上一珠垂縷秋來霜穗重顛倒相撐拄但聞畦墦間昨



蟭如風雨

蜀中俗熟時蟭蛸羣飛田間如小蝗狀而不害稻

新春便入甌玉粒照

筐筥我久食官倉紅腐等泥土行當知此味口腹我已許

姪安節遠來夜坐

心衰而改瘦，踴躍相見，惟應識舊聲。永夜思家在何處？殘年知汝遠來情。良人默坐成癡鈍，問舊驚呼半死生。夢斷酒醒，山雨絕，笑看饑鼠上燈檠。

四時詞

春雲陰陰雪欲落，東風和冷驚羅幕。漸看遠水綠生漪，未放小桃紅入萼。佳人瘦盡雪膚肌，眉斂春愁知爲誰。溪院無人剪刀響，應將白紵作春衣。

垂柳陰陰日初永，蔗漿酪粉金盤冷。簾額低垂紫燕忙，蜜

脾已蒲黃蜂淨高樓睡起翠眉顰枕破斜紅未肯勻玉腕  
半揎雲碧袖樓前知有斷腸人

新愁舊恨眉生綠粉汗餘香在靳竹象牀素手熨寒衣爍  
爍風燈動華屋夜香燒罷掩重扃香霧空濛月蒲庭抱琴  
轉軸無人見門外空聞裂帛聲

霜葉蕭蕭鳴屋角黃昏斗覺羅衾薄夜風搖動鎮帷屏酒  
醒夢回聞雪落起來呵手畫雙鴉醉臉輕勻襯眼霞真態  
香生誰畫得玉奴纖手嗅梅花

雪後到乾明寺遂宿

門外山光馬亦驚堦前屐齒我先行風花誤入宜春苑雪  
月常臨不夜城未許牛羊傷至潔且看鴉鵲弄新晴更須

構被留僧榻待聽摧簷瀉竹聲

正月一日與潘郭二生出郊尋春忽記去年是日  
同至女王城作詩乃和前韻

東風未肯入東門走馬還從去歲邨人似秋鴻來有信事  
如春夢了無痕江城白酒三杯蒲野老蒼顏一笑溫已約  
年年爲此會故人不用賦招魂

紅梅

怕愁貪睡獨聞遲自恐冰容不入時故作小紅桃杏色尚  
餘孤瘦雪霜姿寒心未肯隨春態酒暈無端上玉肌詩老  
不知梅格在更看綠葉與青枝

石曼卿紅梅詩云認桃  
無綠葉辨杏有青枝

寒食雨

春江欲入戶雨勢來不已小屋如漁舟濛濛水雲裏空庖  
煮寒菜破竈燒溼葦那知是寒食但見烏銜紙君門深九重  
墳墓在萬里也擬哭途窮死灰吹不起

徐使君分新火

臨臯亭中一危坐三見清明改新火溝中枯木應笑人鑽  
斫不然誰似我黃州使君憐久病分我五更紅一朶從來  
破釜躍江魚只有清詩嘲飯顆起攜蠟炬遶空屋欲事烹  
煎無一可爲公分作無盡燈照破十方昏暗鎖

蜜酒歌

并序

西蜀道士楊世昌善作蜜酒絕醇醲余旣得其方  
作此歌遺之

真珠爲漿玉爲醴六月田夫汗流泚不如春甕自生香蜂  
爲耕耘花作米一日小沸魚吐沫二日眩轉清光活三日  
開甕香滿城快瀉銀餅不須撥百錢一斗濃無聲甘露微  
濁醍醐清君不見南園採花蜂似雨天教釀酒醉先生先  
生年來窮到骨問人乞米何曾得世間萬事真悠悠蜜蜂  
大勝監河侯

又一首芥二猶子與王郎見和

脯青苔炙青蒲爛蒸鵝鴨乃瓠壺煮豆作乳脂爲酥高燒  
油燭斟蜜酒貧家百物初何有古來百巧出窮人搜羅假  
合亂天真詩書與我爲翅蘗醞釀老夫成縉紳質非文是  
終難久脫冠還作扶藜叟不如蜜酒無煙寒冬不加甜夏

不酸老夫作詩殊少味愛此三篇如酒美封胡羯末已可  
憐不知更有王郎子

弔李臺卿 并序

李臺卿字明仲廬州人貌陋甚性介不羣而博學  
強記罕見其比好左氏有史學考正同異多所發  
明知天文律歷千載之日可坐數也軾謫居黃州  
臺卿爲麻城主簿始識之旣罷居於廬而曹光州  
演甫以書報其亡臺卿光州之妻黨也

我初未識君人以君爲笑垂頭若病鶴烟雨靈七竅弊衣  
來過我危坐若持釣者褒乎面新醲蔑一語妙徐徐涉其  
瀾極望不得微却觀元嫵媚士固難輕料看書眼如月鐸

隙靡不照我老多遺忘得君如再少縱橫通雜藝甚博且知要所恨言無文至老幽不耀其生世莫識已死誰復弔作詩遺故人庶解俗子譙

六年正月二十日復出東門仍用前韻

亂山環合水侵門身在淮南盡處邨五畝漸成終老計九重新掃舊巢痕豈惟見慣沙鷗熟已覺來多釣石溫長與東風約今日暗香先返玉梅魂

元修菜

并序

菜之美者有吾鄉之巢故人巢元修嗜之余亦嗜之元修云使孔北海見當復云吾家菜邪因謂之元修菜余去鄉十有五年思而不可得元修適自

蜀來見余於黃乃作是詩使歸致其子而種之東坡之下云

彼美若家菜鋪田綠茸茸豆莢圓且小槐芽細而豐種之  
秋雨餘擢秀繁霜中欲花而未萼一一如青蟲是時青裙  
女採擷何匆匆烝之復湘之香色蔚其饜點酒下鹽豉縷  
橙芼薑蔥那知雞與豚但恐放箸空春盡苗葉老耕翻烟  
雨叢潤隨甘澤化煖作青泥融始終不我負力與糞壤同  
我老忘家舍楚音變兒童此物獨癯娟終年縻余胸若歸  
致其子囊盛勿雨封張器移甘藷適用如葵藿馬糞穢意  
苴羅生等蒿蓬懸知東坡下圻鹵化千鍾長使齊安人惜  
此說兩翁



二月三日點燈會客

江上東風浪接天苦寒無賴破春妍試看雲夢羔兒酒飲  
瀉錢塘藥玉船蠶市光陰非故國馬行燈火記當年冷烟  
溼雪梅花在畱得新春作上元

次韻孔毅甫久旱已而甚雨三首

饑人忽夢飯甌溢夢中一飽百憂失只知夢飽本來空  
嗟語真饑定何物我生無田食破視爾來視枯磨不去年  
太歲空在酉傍舍壺漿不容乞今年旱勢復如此歲晚何  
以黔吾突青天蕩蕩呼不聞况欲稽首號泥佛甕中蛄蜥  
尤可笑跂跂脉脉何等秋陰陽有時雨有數民是天民天  
自卹我雖窮苦不如人要亦自是民之一形容可似喪家

狗未肯弭耳爭投骨側冠落幘謝朋友獨與蚊雷共圭華  
故人嗔我不開門君視我門誰肯屈可憐明月如潑水夜  
半清光翻我室風從南來非兩侯且爲疲人洗蒸鬱寒棠  
一和快哉謠未暇饑寒念明日

去年東坡拾瓦礫自種黃桑三百尺今年刈艸蓋雪堂日  
炙風吹而如墨平生懶惰今始悔老大勤農天所直沛然  
例賜三尺雨造化無心悅難測四方上下同一雲甘霖不  
爲龍所隔

俗有分龍日

蓬蒿下溼迎曉未燈火新涼催夜織老

夫作罷得甘寢卧聽牆東人響屐奔流未已坑谷平折葦  
枯荷恣漂溺腐儒龐牖支百年力耕不受衆日憐破陂漏  
水不耐旱人力未至求天全會當作塘徑千步橫斷西北

遮山泉四鄰相率助舉杵人人知我囊無錢明年共看決  
渠雨饑飽在我寧關天誰能伴我田間飲醉倒惟有支頭  
磚

天公號令不再出十日愁霖併爲一君家有田水冒田我  
家無田憂入室不如西州楊道士萬里隨身惟兩膝公流  
不惡泝亦佳一葉扁舟任漂突山苧麥麴都不用泥行露  
宿終無疾夜來饑腸如轉雷旅愁非酒不可開楊生自言  
識音律洞簫入手清且哀不須更待秋井塌見人白骨方  
銜盃

和黃魯直食筍次韻

飽食有殘肉饑食無餘菜紛然生喜怒似被狙公賣爾來

誰獨覺凜凜白下宰

太和古  
白下

一飯在家僧至樂甘不壞多

生味蠹簡食符乃餘債蕭然映樽俎未肯離菘芥君看霜  
雪姿童稚已耿介胡爲遭暴橫三喫不忍噉朝來忽解籜  
勢迫風雷噫尚可餉三閤飯筒纏五采

### 海棠

東風娟娟泛崇光香霧霏霏月轉廊只恐夜淡花睡去高  
燒銀燭照紅粧

### 東坡

雨洗東坡月色清市人行盡野人行莫嫌華确坡頭路自  
愛鏗然曳杖聲

### 廬山二勝

并序

余遊廬山南北得十五六其勝殆不可勝紀而懶  
不作詩獨擇其尤者作二首

開先漱玉亭

高巖下赤日溪谷來悲風擘開青玉峽飛出兩白龍亂沫  
散霜雪古澗搖清空餘流滑無聲快寫雙石礎我來不忍  
去月出飛橋束蕩蕩白銀闕沉沉水精宮願隨琴高生脚  
踏赤鯉公手持白芙蕖跳下清冷中

栖賢三峽橋

吾聞太山石積日穿綫溜况此百雷霆萬世與石闕溪行  
九地底嶮出三峽右長輪不盡溪欲滿無底寶跳波翻潛  
魚震響落飛秋清寒入山骨艸木盡堅瘦空濛烟靄間湏

洞金石奏鬱鬱飛橋出漱漱半月散玉淵神龍近雨雹亂  
晴晝垂鉶得清甘可嚙不可漱

岐亭五首 并序

元豐三年正月余始謫黃州至岐亭北二十五里  
山上有白馬青蓋來迎者則余故人陳慥季常也  
爲留五日賦詩一篇而去明年正月復往見之季  
常使人勞余於中途余久不殺恐季常之爲我殺  
也則以前韻作詩爲殺戒以遺季常季常自爾不  
復殺而岐亭之人多化之有不食肉者其後數往  
見之往必作詩詩必以前韻凡余在黃四年三往  
見季常而季常七來見余蓋相從百餘日也七年

四月余量移汝州自江淮徂維送者皆止慈湖而  
季常獨至九江乃復用前韻通爲五篇以贈之

昨日雲陰重東風融雪汁遠林艸木暗近舍烟火溼下有  
隱君子嘯歌方自得知我犯寒來呼酒意頗急拊掌動隣  
里遶邨捉鵝鴨房櫓鏘器聲蔬果照巾裹久聞萋蒿美初  
見新芽赤洗盞酌鵝黃磨刀削熊白須臾我徑醉坐睡落  
巾幘醒時夜向闌唧唧銅餅泣黃州豈云遠但恐朋友缺  
我當安所主君亦無此客朝來坐庵中惟見蜂蠻集

我哀籃中蛤閉口護殘汁又哀網中魚開口吐微溼剝腸  
彼交病過分我何得相逢未寒溫相勸此最急不見盧懷  
慎烝壺似烝鴨坐客皆忍笑然發其幕不見王武子每

食刀機赤琉璃載烝豚中有人乳白盧公信寒陋衰髮得  
滿幘武子雖豪華未死神已泣先生萬金璧護此一蟻缺  
一年如一夢百歲真過客君無廢此篇嚴詩編杜集

君家蜂作窠歲歲添漆汁我身牛穿鼻卷舌聊自涇二年  
三過君此行真得得愛君似劇孟叩門知緩急家有紅顏  
兒能唱綠頭鴨行當隔簾見花霧輕羃羃爲我取黃封親  
拆官泥赤仍須煩素手自點葉家白樂哉無一事十年不  
蓄幘閉門弄漆丁哇笑雜呱泣西方正苦戰誰補將帥缺  
披圖見八陣合散更主客不須親戎行坐論教君集  
酸酒如醢湯甜酒如蜜汁三年黃州城飲酒但飲涇我如  
更揀擇一醉豈易得幾思壓茅柴禁網日夜急西鄰推甕



東坡詩選  
盜醉倒猪與鴨君家大如掌破屋無遮蔽何從得此酒冷  
面妬君赤定應好事人千石供李白爲君三日醉蓬髮不  
暇幘夜淡欲逾垣卧想春甕泣君奴亦笑我鬢齒行禿缺  
三年已四至歲歲遭惡客人生幾兩屐莫厭頻來集

枯松強鑽膏槁竹欲瀝汁兩窮相值遇相哀莫相溼不知  
我與君交遊竟何得心法幸相語頭然未爲急願爲穿雲  
鵲莫作將雛鴨我行及初夏煮酒映疏幕故鄉在何許西  
望千山赤茲遊定安歸東泛萬頃白一歡寧復再起舞花  
墮幘將行出苦語不用兒女泣吾非固多矣君豈無一缺  
各念別時言閉戶謝衆客空堂淨掃地虛白道所集

郭祥正家醉畫竹石壁上郭作詩爲謝且遺古銅劍

二

空腸得酒芒角出肝肺槎牙生竹石森然欲作不可回吐  
向君家雪色壁平生好詩仍好畫書牆泥壁長遭罵不嗔  
不罵喜有餘世間誰復如君者一雙銅劍秋水光兩首新  
詩爭劍鏘劍在牀頭詩在手不知誰作蛟龍吼

龍尾硯歌

并序

余舊作鳳咮石硯銘其畧云蘓子一見名鳳咮坐  
令龍尾燕牛後已而求硯於歙歙人云子自有鳳  
咮何以此爲蓋不能平也奉議郎方君彥德有龍  
尾大硯奇甚謂余若能作詩少解前語者當奉餉  
乃作此詩

黃琮白琥天不惜顧恐貪夫死懷璧君看龍尾豈石材玉  
德金聲寓於石與天作石來幾時與人作硯初不辭詩成  
鮑謝石何與筆落鍾王硯不知錦茵玉匣俱塵垢擣練支  
床亦何有况嘆蘓子鳳咮銘戲語相嘲作牛後碧天照水  
風吹雲明牕大几清無塵我生天地一閒物蘓子亦是支  
離人龔言細語都不擇春蚓秋蛇隨意畫願從蘓子老東  
坡仁者不用生分別

同王勝之遊蔣山

到郡席不暖居民空惘然好山無十里遑恨恐他年欲款  
南朝寺同登北郭船朱門收畫戟紺宇出青蓮荆公宅已爲寺夾  
路蒼髯古迎人翠麓偏龍腰蟠故國鳥爪寄曾巔竹杪飛

華屋松根泣細泉，峯多巧障日江遠。  
欲浮天畧約橫秋水，浮屠插暮烟歸來踏人影。  
雲細月娟娟。

豆粥

君不見呼沱流澌車折軸，公孫倉皇奉豆粥。  
溼薪破竈自燎衣，饑寒頓解劉文叔。  
又不見金谷敲冰草木春，帳下烹煎皆美人。  
萍虀豆粥不傳法，咄嗟而辦石季倫。  
干戈未解身如寄，聲色相纏心已醉。  
身心顛倒自不知，更識人間有真味。  
豈如江頭千頃雪，色蘆茅簷出沒晨烟孤。  
地確春秔光似玉，沙餅煮豆軟如酥。  
我老此身無着處，賣書來問東家住。  
卧聽雞鳴粥熟時，蓬頭曳履君家去。  
秦少游夢發殯而葬之者云是劉發之柩，是歲發首。

薦秦以詩賀之劉涇亦作因次其韻

君看三代士執雉本以殺身爲小補居官死職戰死綏夢  
尸得官真古語五行勝已斯爲官官如艸木吾如土仕而  
未祿猶賓客待以純臣蓋非古餽焉曰獻稱寡君豈比公  
卿相爾汝世衰道微士失已得喪悲歡反其故艸袍蘆箠  
相嫵媚飲食嬉遊事羣聚曲江舳舻月燈毬是謂舞殯而  
歌墓看花走馬到東野餘子紛紛何足數二生年少兩豪  
逸詩酒不知軒冕苦故令將仕夢發棺勸子勿爲官所腐  
塗車芻靈皆假設著眼細看君勿誤時來聊復一飛鳴進  
隱不須煩伍舉

金山夢中作

江東賈客木綿裘會散金山月滿樓夜半潮來風又熟卧  
吹簫管到楊州

次韻周種惠石鈔

銅腥鐵澁不宜泉愛此蒼然淡且寬蟹眼翻波湯已作龍  
頭拒火柄猶寒薑新鹽少茶初熟水漬雲烝蘚未乾自古  
函牛多折足要知無脚是輕安

泗州除夜雪中黃師是送酥酒二首

暮雪紛紛投碎米春流咽咽走黃沙舊遊似夢徒能說逐  
客如僧豈有家冷硯欲書先自凍孤燈何事獨成花使君  
半夜分酥酒驚起妻孥一笑譁

關右土酥黃似酒楊州雲液却如酥欲從元放覓拄杖忽

有翅生來座隅對雪不堪令飽煖隔船應已厭歌呼明朝  
積玉淡三尺高枕牀頭尚一壺

章錢二君見和復次韻荅之

黃昏已作風翻絮半夜猶驚月在沙照汴玉峯明佛剎隔

淮雲海暗人家來艇有信迎三白詹匐無香散六花

詹匐  
梔子

花也與雪  
花皆六出欲喚阿咸來守歲林烏櫪馬鬪喧譁

分無纖手裁春勝况有新詩點蜀酥醉裏冰髭失纓絡夢

回布被起牀隅君應旅隰寒生暈我亦饑腸夜自呼明日

南山春色動不知誰佩紫薇盞

正月一日雪中過淮謁客回作

十里清淮上長堤轉雪籠冰崖落屐齒風葉亂裴茸萬頃

穿銀海千尋渡玉峯從來修月手今在廣寒宮

孫莘老寄墨四首

徂徠無老松易水無良工珍材取樂浪妙手惟潘翁

潘翁作墨

藥用高麗煤

魚胞熟萬杵犀角盤雙龍墨成不敢用進入蓬萊

宮蓬萊春晝永三殿明房櫳金箋洒飛白瑞霧縈長虹遙  
憐醉常侍一笑開天容

谿石琢馬肝刻藤開玉版噓噓雲霧出奕奕龍蛇綰此中  
有何好秀色紛滿眼故人歸天祿古漆窺蠹簡喻麋給尚  
方老手擅編刻分餘幸見及流落一歎赧

我貧如饑鼠長夜空齧醬瓦池研竈煤葦管書柿葉近者

唐夫子遠致烏玉玦

唐林夫寄張遇墨半九

先生又繼之圭璧爛箱



篋清臆洗硯坐虵蚓稍蟠結便有好事人敲門求醉帖  
吾窮本坐詩久服朋友戒五年江湖上開口洗殘債今來  
復稍稍快癢如爬疥先生不譏訶又復寄詩械幽光發奇  
思點黜出荒怪詩成一自笑故疾逢鰕蟹

和人見贈

只寫東坡不著名此身已是一長亭壯心無復春流起衰  
鬢從交病葉零知有雪兒供筆硯應嗤竈婦洗盆餅回來  
索酒公應厭京口新傳作客經

寄蘄簞與蒲傳正

蘭溪美箭不成筍離離玉筍排霜脊下溝萬縷自生風入  
手未開先慘慄公家列屋間蟬眉珠簾不動花陰移霧帳

銀牀初破睡牙籤玉局坐彈碁東坡病瘦長羈旅凍卧饑  
吟似憊風倚賴春風洗破衾一夜雪寒披故絮火冷燈青  
誰復知孤舟兒女自憂咿皇天何時反炎燠愧此八尺黃  
琉璃願公淨掃清香閣卧聽風漪聲滿榻習習還從兩腋  
生請公乘此朝闥闕

贈眼醫王生彥若

鍼頭如麥芒氣出如車軸間關絡脈中性命寄毛粟而况  
清淨眼內景含天燭琉璃貯沆瀣輕脆不任觸而子於其  
間來往施鋒鏃笑談紛自若觀者頸爲縮運鍼如運斤去  
翳如拆屋常疑子善幻他技雜符祝子言吾有道此理昭  
未瞞形骸一塵垢貴賤兩艸木世人方重外妄見瓦與玉

而我初不知刺眼如刺肉君看目與翳是翳要非目目翳  
苟二物易分如麥菽寧聞老農夫去艸更傷穀鼻端有餘  
地肝膽分楚蜀吾於五輪間蕩蕩見空曲如行九軌道並  
驅無擊轂空花誰開落明月自臄臄誰問樂全堂忘年老  
尊宿

彦若樂全先生門下醫也

書林逋詩後

吳儂生長湖山曲呼吸湖光飲山淥不論世外隱君子傭  
兒販婦皆冰玉先生可是絕俗人神清骨冷無由俗我不  
識君曾夢見臄子瞭焉光可燭遺篇妙字處處有步繞西  
湖看不足詩如東野不言寒書似西臺差少肉平生高節  
已難繼將死微言猶可錄自言不作封禪書更肯悲吟白

頭曲

通臨終詩云茂陵異日未  
遺草猶喜初無封禪書

我笑吳人不好事好作祠

堂傍修竹不然配食水仙王一盞寒泉薦秋菊

### 金山妙高臺

我欲乘飛車東訪赤松子蓬萊不可到弱水三萬里不如  
金山去清風半帆耳中有妙高臺雲峯自孤起仰觀初無  
路誰信平如砥臺中老比丘碧眼照牕几巉巖玉爲骨凜  
凜霜入齒機鋒不可觸千偈如翻水何須尋德雲卽此比  
丘是長生未暇學請學長不死

### 過密州次韻趙明叔喬禹功

先生依舊廣文貧老守時遭醉尉嗔汝輩何曾堪一笑吾  
儕相對復三人黃雞催曉淒涼曲白髮驚秋見在身一別

膠西舊朋友扁舟歸釣五湖春

海市 并序

余聞登州海市舊矣父老云常出於春夏今歲晚  
不復見矣余到官五日而去以不見爲恨禱於海  
神廣德王之廟明日見焉乃作此詩

東方雲海空復空羣仙出沒空明中  
蕩搖人世生萬象豈有貝闕藏珠宮  
心知所見嗜幻影敢以耳目煩神工  
歲寒水冷天地閉爲我起蟄鞭魚龍  
重樓翠阜出霜曉異事驚倒百歲翁  
人間所得容力取世外無物誰爲雄  
率然有請不我拒信我人厄非天窮  
潮陽太守南遷歸喜見石廩堆祝融  
自言正直動山鬼豈知造物哀隳垣  
信眉一笑豈易

得神之報汝亦已豐斜陽萬里孤鳥沒但見碧海磨青銅  
新詩綺語亦安用相與變滅隨東風

惠崇春江曉景

竹外桃花三兩枝春江水暖鴨先知蒹蒿滿地蘆芽短正  
是河豚欲上時

次韻胡完夫

青山別淚尚爛斑十載江湖困抱關老去上書還北闕朝  
來拄笏望西山相從盃酒形骸外笑說平生醉夢間萬事  
曾須咨伯始白頭容我占清閒

送戴蒙赴成都玉局觀將老焉

拾遺被酒行歌處野梅官柳西郊路聞道華陽版籍中至

今尚有城南杜我欲歸尋萬里橋木花風葉暮蕭蕭芋魁  
徑尺誰能盡橙木三年已足燒百歲風狂定何有羨君今  
作峨眉叟縱未家生執戟郎也應世出埋輪守莫欺老病  
未歸身玉局他年第幾人會待子猷清興發還須雪夜去  
尋君

送陳睦知潭州

華清縹緲浮高棟上有纈林藏石甕一杯此地初識君千  
巖夜上同飛鞚君時年少面如玉一飲百觚嫌未痛白鹿  
泉頭山月出寒光潑眼如流汞朝元閣上酒醒時卧聽風  
鑿鳴鐵鳳舊遊空在人何處二十三年真一夢我得生還  
雪髯滿君亦老嫌金帶重有如社燕與秋鴻相逢未穩還

相送洞庭青艸渺無際天柱紫蓋森欲動湖南萬古一長  
嗟付與騷人發嘲弄

次韻朱光庭初夏

朝罷人人識鄭崇直聲如在履聲中卧聞疎響梧桐雨獨  
詠微涼殿閣風諫苑君方續承業醉鄉我欲訪無功陶然  
一枕誰呼覺牛蟻新除病後聰

玉堂栽花周正孺有詩次韻

故山桃李半荒榛粗報君恩便乞身竹簟暑風招我老玉  
堂花蘂爲誰春纖纖翠蔓詩催發皎皎霜葩髮鬪新只有  
來禽青李帖他年畱與學書人

武昌西山 并序



嘉祐中翰林學士承旨鄧公聖求爲武昌令常遊  
寒溪西山山中人至今能言之軾謫居黃岡與武  
昌相望亦嘗往來溪山間元祐元年十一月二十  
九日考試館職與聖求會宿玉堂偶話舊事聖求  
嘗作元次山窪樽銘刻之巖石因爲此詩請聖求  
同賦當以遺邑人使刻之銘側

春江綠漲蒲萄醅武昌官柳知誰栽憶從樊口載春酒步  
上西山尋野梅西山一上十五里風駕雨掖飛崔嵬同遊  
困卧九曲嶺寨衣獨到吳王臺中原北望在何許但見落  
日低黃埃歸來解劒亭前路蒼崖半入雲濤堆浪翁醉處  
今尚在石臼杯飲無樽鼎爾來古意誰復嗣公有妙語留

山隈至今好事除艸棘常恐野火燒蒼苔當時相望不可  
見玉堂正對金鑾開豈知白首同夜直卧看椽燭高花摧  
江邊曉夢忽驚斷銅環玉鎖鳴春雷山人帳空猿鶴怨江  
湖水生鴻鴈來請公作詩寄父老往和萬壑松風哀

送楊孟容

我家峩眉陰與子同一邦相望六十里共飲玻璃江江山  
不違人遍滿千家牕但苦牕中人寸心不自降子歸治小  
國洪鐘噓微撞我畱侍玉座弱步歛豐扛後生多高才名  
與黃童雙不肯入州府故人餘老龐慙慙與問訊愛惜霜  
眉龐何以待我歸寒醅發春缸

書李世南所畫秋景

野水參差落漲痕疎林欹倒出霜根扁舟一棹歸何處家在江南黃葉邨

慶源宣義王丈以累舉得官爲洪雅主簿雅州戶掾遇吏民如家人人安樂之旣謝事居眉之青神瑞艸橋放懷自得有書來求紅帶旣以遺之且作詩爲戲請黃魯直學士秦少游賢良各爲賦一首爲老人光華

青衫半作霜葉枯遇民如兒吏如奴吏民莫作官長看我是識字耕田夫妻啼兒號刺史怒時有野人來挽鬚拂衣自注下下考芋魁飯豆吾豈無歸來瑞艸橋邊路獨遊還佩平生壺慈母巖前自喚渡青衣江上人爭扶今年蠶市

數州集中有遺民懷袴襦邑中之黔相指似白髯紅帶老  
不癯我欲西歸卜隣舍隔牆拊掌容歌呼不學山王乘駟  
馬回頭空指黃公壚

次前韻送程六表弟

君家兄弟真連璧門十朱輪家萬石竹使猶分刺史符尚  
方行賜尚書烏前年持節發倉廩到處賣刀收鹽粟歸來  
閉口不論功却走渡江誰復惜君才不用如澗松我老得  
全猶社櫟青衫莫厭百僚底白首上有千薪積憶昔江湖  
一釣舟無數雲山供點筆未應便障西風扇只恐先移北  
山檄憑君寄謝江南叟念我空見長安日浮江汭蜀有成  
言注水在此吾不食

書王定國所藏煙江疊障圖

王晉卿書

江上愁心千疊山，浮空積翠如雲煙。  
山耶雲耶遠莫知，煙空雲散山依然。  
但見兩崖蒼蒼暗絕谷，中有百道飛來泉。  
縈林絡日隱復見，下赴谷口爲奔川。  
川平山開林麓斷，小橋野店依山前。  
行人稍度喬木外，漁舟一葉江吞天。  
使君何從得此本，點綴毫末分清妍。  
不知人間何處有此境，徑欲往置二頃田。  
君不見武昌樊口幽絕處，東坡先生留五年。  
春風搖江天漠漠暮雲卷，雨山娟娟丹楓翻。  
鴉伴水宿長松落雪驚，醉眠桃花流水在人世。  
武陵豈必皆神仙，江上清空我塵土。  
雖有去路尋無緣，還君此畫三歎息。  
山中故人應有招我歸來篇。

興龍節侍宴前一日微雪與子由同訪王定國小飲  
清虛堂定國出數詩皆佳而五言尤奇子由又言昔  
與孫巨源同過定國感念存歿悲歎久之夜歸稍醒  
各賦一篇明日朝中以示定國也

天風淅淅飛玉沙詔恩歸沐休早衙遙知清虛堂裏雪正  
似簷蔔林中花出門自笑無所詣呼酒持勸惟君家踏冰  
凌兢戰疲馬扣門剝啄驚寒鴉羨君五字入詩律欲與六  
出爭天葩頭風已倩撒手愈背癢恰得仙爪爬銀鉶瀉油  
浮蟻酒紫盃鋪栗盤龍茶幅巾起作鴈鴒舞疊鼓誰摻漁  
陽撾九衢燈火雜夢寐十年聚散空咨嗟明朝握手殿門  
外共看銀闕曉晨霞

夜直玉堂攜李之儀端叔詩百餘首讀至夜半書其  
後

玉堂清冷不成眠伴直難呼孟浩然暫借好詩消永夜每  
逢佳處輒參禪愁侵視滴初含凍喜入燈花欲鬪妍寄語  
君家小兒子他時此句一時編

與莫同年雨中飲湖上

到處相逢是偶然夢中相對各華顛還來一醉西湖雨不  
見跳珠十五年

次韻荅劉景文左藏

我老詩壇仆鼓旗借君佳句發良時但空賀監杯中物莫  
示孫郎帳下兒夜燭催詩金盞落秋芳壓帽露華滋故應

好語如爬癢有味難名只自知

參寥上人初得智果院會者十六人分韻賦詩軼得  
心字

潞水返舊壑飛雲思故岑念君忘家客亦有懷歸心三間  
得幽寂數步藏清溪攢金盧橘塢散火楊梅林茶筍盡禪  
味松杉真法音雲崖有淺井玉醴常半尋遂名參寥泉可  
濯幽人襟相攜橫嶺上未覺衰年侵一眼吞江湖萬象涵  
古今願君更小築歲晚解我簪

次韻劉景文周次元寒食同遊西湖

絮飛春減不成年老景同乘下瀨船藍尾忽驚新火後

樂天

寒食詩云三盃藍尾酒一碟膠牙餠

三盃藍尾酒一碟膠牙餠

遨頭要及浣花前

成都太守自正月二日出游至四月十九



日浣花 山西老將詩無敵洛下書生語更妍共向北山尋  
乃止 二士畫橈鼙鼓聒清眠

次韻林子中王彥祖唱酬

早知身寄一區中晚節尤驚落木風

近聞莘老公擇皆逝故有此句昨夢

已論三世事歲寒猶喜五人同

軾與子中彥祖子敦完夫同試舉人景德寺今皆健

雨餘北固山園座春盡西湖水映空差勝四明狂監在更  
將老眼犯塵紅

壽星院寒碧軒

清風肅肅搖牕牕前修竹一尺圍紛紛蒼雪落夏簾冉  
冉綠霧霏人衣日高山蟬抱葉響人靜翠羽穿林飛道人  
絕粒對寒碧爲問鶴骨何緣肥

題楊次公春蘭

春蘭如美人不採羞自獻時聞風露香蓬艾深不見丹青  
寫真色欲補離騷傳對之如靈均冠佩不敢燕

次韻劉景文登介亭

澤國梅雨餘衰年困烝溽高堂磨新塼頗覺利腰足松根  
百尺井兩綆飛淨淥流觴聚兒童一笑爲捧腹清風信可  
馭剛氣在巖麓始知共此世物外無三伏長歌入雲去不  
待管絃逐西湖真西子烟樹點眉目濤江少醞藉高浪翻  
雪屋俛仰拊四海百世飛鳥速遠追錢氏餘近弔祖侯躅  
吾生如寄耳寸晷輕尺玉誰似劉將軍逸韻謝邊幅千言  
一揮手五車不再讀春寒彩雞舞月峽哀猿哭朝先啼鵲

起暮與寒蟄續我老廢吟哦賴君時擊觸從今事遠覽發  
軻此幽谷清游得三昧至樂謝五欲莫作狂道士氣壓劉  
師服

稷筍 并序

稷筍狀如魚剖之如魚子味如苦筍而加甘芳蜀  
人以饌師僧甚貴之而南方不知也筍生膚毳中  
葢花之方孕者正二月間可剝取過此苦澀不可  
食矣取之無害於木而宜於飲食法當烝熟所施  
畧與筍同蜜煮酢浸可致千里外今以餉殊長老  
贈君木魚三百尾中有鵝黃子魚子夜叉剖嚙欲分甘鐔  
龍藏頭敢言美願隨蔬果得自用勿使山林空老死問君

何事食木魚烹不能鳴固其理

西湖秋涸東池魚窘甚因會客呼網師遷之西池爲  
一笑之樂夜歸被酒不能寐戲作放魚一首

東池浮萍半粘塊裂碧跳青出魚背西池秋水尚涵空舞  
闌搖淡吹荇帶吾僚有意爲遷居老守縱饒那忍膾縱橫  
爭看銀刀出灩澦初驚玉花碎但愁數罟損鱗鱗未信長  
隄隔濤瀨濺濺潑潑須臾聞閤圍洋洋尋丈外安知中無  
蛟龍種尚恐或有風雲會明年春水漲西湖好去相忘渺  
淮海

歐季默以油烟墨二丸見餉各長寸許戲作小詩  
書牕拾輕煤佛帳掃餘馥辛勤破千夜收此一寸玉癡人

與老癯腐朽同艸木欲將東山松湮盡南山竹墨堅人苦  
脆未用歎不足且當注蟲魚莫艸三千牘

聚星堂雪

并序

元祐六年十一月一日禱雨張龍公得小雪與客  
會飲聚星堂忽憶歐陽文忠公作守時雪中約客  
賦詩禁體物語於艱難中特出奇麗爾來四十餘  
年莫有繼者僕以老門生繼公後雖不足追配先  
生而賓客之美殆不減當時公之二子又適在郡  
故輒舉前令各賦一篇以爲汝南故事云

牕前暗響鳴枯葉龍公試手行初雪映空先集疑有無作  
態斜飛正愁絕衆賓起舞風竹亂老守先醉霜松折恨無

翠袖點橫斜祇有微燈照明滅歸來尚喜更鼓永晨起不  
待鈴索掣未嫌長夜作水稜却怕初陽生眼纈欲浮大白  
追餘賞幸有回颺驚落屑模糊檜頂獨多時歷亂瓦溝裁  
一瞥汝南先賢有故事醉翁詩話誰續說當時號令君聽  
取白戰不許持寸鐵

次韻趙景貺春思且懷吳越山水

歲華來無窮老眼久已靜春風如繫馬未動意先騁西湖  
忽破碎鳥落魚動鏡縈城理枯瀆放開起膠艇願君營此  
樂宦事何時竟清河西湖三思吳信偶然出處付前定飄  
然不繫舟乘此無盡興醉翁行樂處艸木皆可敬明朝游  
北渚急掃黃蘗徑白酒真到齊紅裙已放鄭

酒尚有香泉  
一壺爲樂全

先生服不  
作樂也

洞庭春色 并序

安定郡王以黃柑釀酒謂之洞庭春色色香味三  
絕以餉其猶子德麟德麟以飲予爲作此詩醉後  
信筆頗有沓拖風氣

二年洞庭秋香霧長喚手今年洞庭春玉色疑非酒賢王

文字飲醉筆蛟蛇走既醉念君醒遠餉爲我壽餅開香浮

座醖凸光照牖方傾安仁醪

請岳笙賦云披黃苞以授柑傾綠瓷以酌醪

莫遣

公遠鯁

明皇食柑凡千餘枚皆闕一瓣問進柑使者云中途皆有道士鯁之蓋羅公遠也

要當立

名字未可問升斗應呼釣詩釣亦號掃愁帝君知蒲萄惡

正是嫖婦黥須君灔海盃澆我談天口

和陳傳道雪中觀燈

新年樂事歎何曾  
閉閣燒香一病僧  
未忍便傾澆別酒  
且來同看照燈  
魚躍處  
新亭近湖雪消時  
畫舫升祇恐樽前無此客  
清詩還有士龍能

送晁美叔

我年二十無朋儔  
當時四海一子由  
君來扣門如有求  
願然病鶴清而修  
醉翁遣我從子游  
翁如退之蹈軻丘  
尚欲放予出一頭  
嘉祐初賦與子由寓典國藩室美叔忽見訪謂子必名世也夫亦須放他出一頭地  
酒醒夢斷四十秋  
病鶴不病骨愈蚪  
惟有我顏老可羞  
醉翁賓客散九州  
幾人白髮還相收  
我如懷祖拙自謀  
正作尚書已過優  
君求會稽實良壽  
往看



萬壑爭交流

君近乞  
越州

予少年頗知種松手植數萬株皆中梁柱矣都梁山  
中見杜輿秀才求學其法戲贈二首

露宿泥行艸棘中十年春雨養髯龍如今尺五城南杜欲  
問東坡學種松

君方掃雪收松子我已開榛得茯苓爲問何如插楊柳明  
年飛絮作浮萍

僕所藏仇池石希代之寶也王晉卿以小詩借觀意  
在於辱僕不敢不借然以此詩先之

海石來珠宮秀色如蛾綠坡陀尺寸間宛轉陵巒足連娟  
二華頂空洞三茅腹初疑仇池化又恐靈鷲變慙慙嶠南

使餽餉淮東牧

僕在揚州程德孺由嶺南解官以此石見遺

得之喜無寐與汝

交不瀆盛以高麗盆藉以文登玉

僕以高麗所鑄大銅盆貯之又以登州海石如

碎玉者附其足

幽光先五夜冷氣壓三伏老人生如寄衡茅久未

卜一夫幸可致千里還相逐風流貴公子竄謫武當谷見山應已厭何事奪所欲欲留嗟趙弱寧許負秦曲傳觀慎勿許間道歸更速

王晉卿示詩欲奪海石錢穆父王仲至蔣穎叔皆次韻穆至二公以爲不可許獨穎叔不然今日穎叔見訪親視此石之妙遂悔前語軾以謂晉卿豈可終閉不予者若能以韓幹二散馬易之者蓋可許也復次

前韻

相如有家山縹緲在眉綠誰云千里遠寄此一顰足平生  
錦繡腸蚤歲藜莧腹從教四壁空未遣兩峯蹙吾今况衰  
病義不忘樵牧逝將仇池石歸沂岷 守子不貪寶完  
我無瑕玉故人詩相戒妙語予所伏一篇獨異論三占從  
兩卜君家書可數天驥紛相逐風驟掠原野電尾梢澗谷  
君如許相易是亦我所欲今朝安西守來聽陽關曲勸我  
留此峰他日來不速

軾欲以石易書晉卿難之穆父欲兼取二物穎叔欲  
焚書碎石乃復次前韻并解三詩之意

春冰無真堅露葉失故綠鵲疑鵬萬里竄笑夔一足二豪  
爭攘袂先生一捧腹明鏡既無臺淨瓶何足蹙

古璣  
盆山

不可隱畫馬無由牧聊將置庭宇何必棄溝瀆焚寶真愛  
寶碎玉未忘玉久知公子賢出語耆年伏欲觀博物妙故  
以求馬卜維摩旣復捨天女還相逐授之無盡燈照此久  
幽谷定心無一物法樂勝五欲三峨吾鄉井萬里君部曲  
卧雲行歸休破賊見神速

晉卿將種  
常有此志

### 東府雨中別子由

庭下梧桐樹三年三見汝前年適汝陰見汝鳴秋雨去年  
秋雨時我自廣陵歸今年山中去白首歸無期客去莫歎  
息主人亦是客對牀定悠悠夜雨空蕭瑟起折梧桐枝贈  
汝千里行重來知健否莫忘此時情

### 書丹子元所示李太白真

天人幾何同一瀛。謫仙非謫，乃其遊塵。斥八極隘九州，化為兩鳥鳴相酬。一鳴一止，三千秋。開元有道，爲少留縻之。不可矧肯求。西望太白橫峨岷，眼高四海空無人。大兒汾陽中，令君小兒天台坐。忘真生平不知高，將軍手汗吾足乃敢。瞋作詩一笑，君應聞。

鵲嘆

園中有鵲，馴可呼。我欲呼之立坐，隅鵲有難色。側睨予，豈欲臆對如鵬乎？我生如寄，良畸孤三尺長脰，閤瘦軀俛啄。少許便有餘，何至以身爲子娛。驅之上堂，如斯須投以餅餌，視若無。噉然長鳴，乃下趨難進。易退我不如。

寄饒舍刷餅與子由

老人心事日推頽，宿火通紅手自焙。  
小饊短餅良具足，穉兒嬌女共蟠煨。  
寄君東閣閑烝栗，知我空堂坐畫灰。  
約束家僮好收拾，故山梨棗待翁來。

子由新修汝州龍興寺吳畫壁

丹青久衰工不抗，人物尤難到今世。  
每摹市井作公卿，畫手懸知是徒隸。  
吳生已與不傳死，那復典刑留近歲。  
人間幾處變西方，盡作波濤翻海勢。  
細觀手面分轉側，妙算毫釐得天契。  
始知真放本精微，不比狂花生客慧。  
似聞遺墨畱汝海，古壁蝸涎可垂涕。  
力捐金帛扶棟宇，錯落浮雲卷新霽。  
使君坐歎清夢餘，幾疊衣紋數襟袂。  
他年弔古知有人，姓名聊寄東坡弟。

六月七日泊金陵阻風得鍾山泉公書寄詩爲謝  
今日江頭天色惡。礮車雲起風欲作。獨望鍾山喚寶公。林  
間白塔如孤鶴。寶公骨冷喚不聞。却有老泉來喚人。電眸  
虎齒霹靂舌爲予。吹散千峯雲。南行萬里亦何事。一酌曹  
溪知水味。他年若畫蔣山圖。爲作泉公喚居士。

秧馬歌 并引

過廬陵見宣德郎致仕曾君安止出所作禾譜文  
旣溫雅事亦詳實惜其有所缺不譜農器也予昔  
遊武昌見農夫皆騎秧馬以榆棗爲腹欲其滑以  
楸桐爲背欲其輕腹如小舟昂其首尾背如覆瓦  
以便兩腳雀躍於泥中繫束槩其首以縛秧日行

于畦較之偃僂而作者勞佚相絕矣史記禹乘四  
載泥行乘橇解者曰橇形如箕橇行泥上豈秧馬  
之類乎作秧馬歌一首附於禾譜之末云

春雲濛濛雨淒淒春秧欲老翠剡齊嗟我婦子行水泥朝  
分一隴暮千畦腰如笊篲首啄雞筋煩骨殆聲酸嘶我有  
桐馬手自提頭尻軒昂腹脇低背如覆瓦去角圭以我兩  
足爲四蹄聳踊滑汰如鳬鷺纖纖束縶亦可齎何用繁纓  
與月題揭從畦東走畦西山城欲閉聞鼓鼙忽作的盧躍  
檀溪歸來挂壁從高栖了無芻秣饑不啼少壯騎汝逮老  
鰥何曾蹶軼防顛擠錦韉公子朝金閨笑我一生蹋牛犁  
不知自有木駃騠



東坡詩選  
寓居合江樓

海山葱朧氣佳哉二江合處朱樓開蓬萊方丈應不遠皆  
爲蘓子浮江來江風初涼睡正美樓上啼鴉呼我起我今  
身世兩相違西流白日東流水樓中老人日清新天上豈  
有癡仙人三山咫尺不歸去一盃付與羅浮春

予家釀酒  
名羅浮春

朝雲詩

并引

世謂樂天有粥駱馬放楊柳枝詞嘉其主老病不  
忍去也然夢得有詩云春盡絮飛留不得隨風好  
云落誰家樂天亦云病與樂天相伴住春隨樊素  
一時歸則是樊素竟去也予家有數妾四五年相  
繼辭去獨朝雲者隨予南遷因讀樂天集戲作此

詩朝雲姓王氏錢塘人嘗有子曰幹兒未期而夭

云

不似楊枝別樂天恰如通德伴伶玄阿奴絡秀不同老天  
女維摩總解禪經卷藥爐新活計舞衫歌扇舊因緣丹成  
逐我三山去不作巫陽雲雨仙

十一月二十六日松風亭下梅花盛開

春風嶺上淮南邨昔年梅花曾斷魂予昔赴黃州春風嶺上見梅花有兩絕句  
明年正月往岐亭道中賦詩云去年今日開山路細雨梅花正斷魂豈知流落復相見蠻風  
蜩雨愁黃昏長條半落荔支浦卧樹獨秀枕椰園豈惟幽  
光留夜色直恐冷艷排冬溫松風亭下荊棘裏兩株玉蕊  
明朝瞰海南仙雲嬌墮砌月下縞衣來扣門酒醒夢覺起

繞樹妙意只在終無言先生獨飲勿歎息幸有落月窺清樽

再用前韻

羅浮山下梅花邨玉雪爲骨冰爲魂紛紛初疑月挂樹耿耿獨與參橫昏先生索居江海上悄如病鶴栖荒園天香國艷肯相顧知我酒熟詩清溫蓬萊宮中上鳥使綠衣倒挂扶桑暎抱叢窺我方醉卧故遣啄木先育門麻姑過君急酒掃烏能歌舞花能言酒醒人散山寂寂惟有落蕊粘空樽

黃南珍禽有倒挂子綠毛紅喙如鸚鵡面小白海東來非塵埃間物也

新釀桂酒

倚香篩辣入瓶盎盎春溪帶雨渾收拾小山藏社甕招

呼明月到芳樽酒材已遣門生致菜把仍叨地主恩爛煮  
葵根斟桂醕風流可惜在蠻邨

詹守攜酒見過用前韻作詩聊復和之

箕踞狂歌老瓦盆燎毛燔肉似羗渾傳呼艸市來攜客酒  
掃漁磯共置樽山下黃童爭看舞江干白骨已銜恩

時詹方議

瘞暴骨孤雲落日西南望長羨歸鴉自識邨

寄鄧道士

并引

羅浮山有野人相傳葛稚川之隸也鄧道士守安  
山中有道者也嘗於菴前見其足跡長二尺許紹  
聖二年正月十日予偶讀韋蘓州寄全椒山中道  
士詩云今朝郡齋冷忽念山中客澗底束荆薪歸

來煮白石遙持一樽酒遠慰風雨夕落葉滿空山  
何處尋行迹乃以酒一壺仍依蘓州韻作詩寄之

云

一杯羅浮春遠餉採薇客遙知獨酌罷醉卧松下石幽人  
不可見清嘯聞月夕聊戲庵中人空飛本無迹

上元夜

前年侍玉輦端門萬枝燈璧月挂罌魚珠星綴觚稜去年  
中山府老病亦宵興牙旗穿夜市鐵馬響春冰今年江海  
上雲房寄山僧亦復舉膏火松間見層層散策枕榔林林  
疎月崩髻使君置酒罷簫鼓轉松陵狂生來索酒

賈道人  
也一

舉輶數升浩歌出門去我亦歸曹騰

真一酒 并引

米麥水三一而已此東坡先生真一酒也

撥雪披雲得乳泓蜜蠶又欲醉先生

真一色味頗類予在黃州日所醞蜜酒也

稻垂麥仰陰陽足器縈泉新表裏清曉日著顏紅有暈春風入髓散無聲人間真一東坡老與作青州從事名

游博羅香積寺

并引

寺去縣七里三山犬牙夾道皆美田麥禾甚茂寺下谿水可作碓磨若築塘百步閘而落之可轉兩輪舉四杵也以屬縣令林朴使督成之

二年流落黿魚鄉朝來喜見麥吐芒東風搖波舞淨綠初日泫露酣燭黃汪汪春泥已沒膝刻刻秋穀初分秧誰言

萬里出無友見此二美喜欲狂三山屏擁僧舍小一谿雷  
轉松陰涼要令水力供磴磨與相地脉增隄防霏霏落雪  
看收麴隱隱鼙鼓聞春糠散流一啜雲子白炊裂十字瓊  
肌香豈惟牢九薦古珠東晉餅賦云漫頭薄荷起搜牢九要使真一流仙  
漿詩成捧腹便絕倒書生說食真膏肓

四月十一日初食荔支

南邨諸楊北邨盧謂楊梅盧橘也白花青葉冬不枯垂黃綴紫烟  
雨裏特與荔支爲先驅海山仙人絳羅襦紅紗巾單白玉  
膚不須更待妃子笑風骨自是傾城殊不知天工有意無  
遣此尤物生海隅雲山得伴松檜老霜雪自困楂梨飽先  
生洗盞酌桂醕永漿薦此頰虬珠似聞江鱗斫玉柱更洗

河豚烹腹腴

予嘗聞蒟支厚味高格兩絕果中無此惟江鱈柱河豚魚近之耳

我生涉世

本爲口一官久已輕尊鱸人間何者爲夢幻南來萬里真

良圖

同正輔表兄遊白水山

偉哉造物真豪縱搜土搏沙爲此弄擘開翠峽走雲雷截  
破奔流作潭洞因隨化人履巨迹得與仙兄蹠飛鞚曳杖  
不知巖谷深穿雲但覺衣裘重坐看驚鳥投霜葉知有老  
蛟蟠石甕金沙玉礫粲可數古鏡寶奩寒不動念兄獨立  
與世疎絕境難到惟我共永辭角上兩蠻觸一洗胸中九  
雲夢浮來山高回望失武陵路絕無人送筠籃擷翠爪甲  
香素纈分碧銀餅凍歸路霏霏湯谷暗野堂活活神泉涌



解衣浴此無垢人身輕可試雲間鳳

雨後行菜

夢回聞雨聲喜我菜甲長平明江路溼並岸飛兩槳天公  
真富有膏乳瀉黃壤霜根一番滋風葉漸俯仰未任筐筥  
載已作盃案慙艱難生理窄一味敢專饗小摘飯山僧清  
安寄真賞芥藍如茵蕈脆美牙頰響白菰類羔豚胃土出  
蹣掌誰能視火候小竈當自養

次韻二守同訪新居

數畝蓬蒿古縣陰曉牕清快夜堂深也知卜築非真宅聊  
欲踟蹰看此心聞道攜壺問奇字更因登木助微音相娛  
北戶江千頃直下都無地可臨

白鶴山新居鑿井四十尺遇磐石石盡乃得泉

海國困烝溽新居利高寒以彼陟降勞易此寢處乾但苦  
江路峻常慙汲腰酸矻矻煩四夫磽磽斲層巒旬得尋  
丈下有青石磐終日但逆火何時見飛瀾豐我粢與醪利  
汝椎與鑽山石有時盡我意殊未闌今朝僮僕喜黃土復  
可搏晨餅得雪乳莫甕渟水湍我生類如此何適不艱難  
一勺亦天賜曲肱有餘歡

行瓊儋間肩輿坐睡夢中得句云千山動鱗甲萬谷  
酣笙鐘覺而遇清風急雨戲作此數句

四州環一島百洞蟠其中我行西北隅如度月半弓登高  
望中原但見積水空此生當安歸四顧真途窮眇觀大瀛

海坐詠談天翁茫茫太倉中一米誰雌雄幽懷忽破散永  
嘯來天風千山動鱗甲萬谷酣笙鐘安知非羣仙釣天寔  
未終喜我歸有期舉酒屬青童急雨豈無意催詩走羣龍  
夢雲忽變色笑雷亦改容應怪東坡老顏衰語徒工久矣  
此妙聲不聞蓬萊

安期生

并引

安期生世知其爲仙者也然太史公曰蒯通善齊  
人安期生生嘗以策干項羽羽不能用羽欲封此  
兩人兩人終不肯受亡去予每讀此未嘗不廢書  
而歎嗟乎仙者非斯人而誰爲之故意戰國之士  
如魯連虞卿皆得道者歟

安期本策士平日交刺通嘗于重瞳子不見隆準公應如  
魯仲連抵掌吐長虹難堪踞牀洗寧揖扛鼎雄事既兩大  
繆飄然籥遺風乃知經世士出世或乘龍豈比江澤雁忍  
饑啖柏松縱使偶不死正堪爲僕僮茂陵秋風客望祖猶  
蟻蠡海上如瓜棗可聞不可逢

夜夢

并引

七月十三日至儋州十餘日矣澹然無一事學道  
未至靜極生愁夜夢如此不免以書自怡

夜夢嬉遊童子如父師檢責驚走書計功當畢春秋餘今  
乃始及桓莊初怛然悸寤心不舒起坐有如挂鉤魚我生  
紛紛嬰百緣氣固多習獨此偏棄書事君二十年仕不顧

留書繞纏自視汝與丘孰賢易韋三絕丘猶然如我當以  
犀革編

聞子由瘦

儻耳至難得肉食

五日一見花豬肉十日一遇黃雞粥土人頓頓食諸芋薦  
以熏鼠燒蝙蝠舊聞蜜唧嘗嘔吐稍近蝦蟆緣習俗十年  
京國厭肥羜日日烝花壓紅玉從來此腹負將軍今者固  
宜安脫粟俗諺云大將軍食飽捫腹而歎曰我不負汝左  
右曰將軍固不負此腹此腹負將軍未嘗出少  
智慮也人言天下無正味卽且未遽賢麋鹿海康別駕復何  
爲帽寬帶落驚僮僕相看會作兩雕仙還鄉定可騎黃鶴

宥老楮

我牆東北隅張王維老穀樹先樛櫟大葉等桑柘沃流膏

馬乳漲墮子楊梅熟胡爲尋丈地養此不材木歟之得興  
薪規以種松菊靖言求其用畧數得五六膚爲蔡侯紙子  
入桐君錄黃繒練成素黝面頰作玉灌灑烝生菌腐餘光  
吐燭雖無傲霜節幸免狂醒毒孤根信微陋生理有倚伏  
投斧爲賦詩德怨聊相贖

午牕坐睡

蒲團盤兩膝竹几閣雙肘此間道路熟徑到無何有身心  
兩不見息息安且久睡蛇本亦無何用鉤與手神凝疑夜  
禪體適劇卯酉我生有定數祿盡空餘壽枯楊下飛花膏  
澤回衰朽謂我此爲覺物至了不受謂我今方夢此心初  
不垢非夢亦非覺請問希夷叟

過於海舶得邁寄書酒作詩遠和之皆粲然可觀子  
由有書相慶也因用其韻賦一篇并寄諸子姪

我似老牛鞭不動雨滑泥濘四蹄重汝如黃犢走却來海  
澗山高百程送庶幾門戶有八慈不恨居鄰無二仲他年  
汝曹笏滿牀中夜起舞踏破甕會當洗眼看騰躍莫指癡  
腹笑空洞譽兒雖是兩翁癖積德已自三世種豈惟萬一  
許生還尚恐九十煩珍從六子晨耕簞瓢出衆婦夜績燈  
火共春秋古史乃家法詩筆離騷亦時用但令文字還照  
世糞土腐餘安足夢

縱筆

寂寂東坡一病翁白鬚蕭散滿霜風小兒悞喜朱顏在一

笑那知是酒紅

父老爭看烏角巾應緣曾現宰官身溪邊古路三叉口獨立斜陽數過人

庚辰歲正月十二日天門冬酒熟予自漉之且漉且嘗遂以大醉

自撥牀頭一甕雲幽人先已醉濃芬天門冬熟新年喜麴米春香竝舍聞杜子美詩云聞道雲安麴米春蓋酒名也菜圃漸疎花漠漠竹扉斜掩雨紛紛擁裘睡覺知何處吹面東風散纈紋

### 汲江煎茶

活水還須活火烹

唐人云茶須緩火多活火煎

自臨鈞石汲澗清大瓢

貯月歸春甕小杓分江入夜鉶雪乳已翻煎處脚松風忽



作瀉時聲枯腸未易禁三盃坐聽山城長短更

澄邁驛通潮閣二首

倦客遙聞歸路遙眼明飛閣俯長橋貪看白鷺橫秋浦不  
覺青林沒晚潮

餘生欲老海南邨帝遣巫陽招我魂杳杳天低鶻沒處青  
山一髮是中原

過嶺

暫著南冠不到頭却隨北鴈與歸休平生不作兔三窟今  
古何殊貉一丘當日無人送臨賀至今有廟祀潮州劒關  
西望七千里乘興真爲玉局游

贈詩僧道通

雄豪而妙苦而腴祇有琴聰與蜜殊

錢塘僧思聰總角善琴後捨琴而學詩復

乘詩而學道其詩似皎然而加雄放安州僧仲殊詩敏捷立成而工妙絕人遠甚殊辟穀常啖蜜

語帶烟

霞從古少

李太白云他人之文如山無刺霞春無艸木

氣含蔬笋到公無

謂無酸餇

氣也香邨乍喜聞簪荷古井惟愁斷轆轤爲報韓公莫輕許從今島可是詩奴

### 靈上訪道人相遇

花光紅滿欄草色綠無岸不逢青眼人長歌白石澗

### 黃州

南山一尺雪雪盡山蒼然澗谷溪自暖梅花應已繁使君厭騎從車馬畱山前行歌招野叟共步青林間長松得高蔭盤石堪醉眠祇樂聽山鳥攜琴寫幽泉愛之欲忘返但

苦世俗牽歸來始覺遠明月高峯顛

穆父新涼

家居妻兒號出仕猿鶴怨未能逐什一安敢搏九萬常恐  
枵櫟身坐纏冠蓋蔓受恩如負債粗報乃焚券但知眠牛  
衣寧免刺虎圈清風來旣雨新稻香可飯紫螯應已肥白  
酒誰能勸君今雀蔡手政比張趙健三公行可致一語自  
先獻幸推江湖心適我魚鳥願

中王畫馬圖

天寶諸王愛名馬千金爭致華軒下當時不獨玉花驄飛  
電流雲絕瀟灑兩坊岐薛寧與中憲陵內廐多清新肉駿  
汗血盡龍種紫袍玉帶真天人驪山射獵血原墜御前急

詔穿圍入揚鞭一蹙破霜蹄萬騎如風不能及鴈飛兔走

驚弦開翠華按轡從天回五家錦繡變一作山谷百里易

珥遺纖埃青螺蜀棧兩一作西超忽高準濃娥散荆棘回首

追風趨日飛一作首菴連天鳥自飛五陵佳氣春蕭瑟

揚州以土物寄少游

鮮鯽經年秘醺醪團臍紫蟹脂填腹後春尊茁活如酥先

社莖芽肥勝肉鳥子繁纍何足道點綴盤餐亦時欲淮南

風俗事瓶甕方法相傳竟留蓄且同千里寄鵝毛何用攷

夜飲麋鹿此詩前八句編載淮海集疑必有誤

贈山谷子

黃童三尺世無雙筆頭衮衮懸秋江不憂老子難爲父平

生彌強今心降我來喜共阿戎語應敵縱橫如急雨生子  
還如孫仲謀豚犬謾多何足數黃家小兒名拾得眉如長  
松眼如漆只今數歲已動人老人隔眼看他日笑君老蚌  
生明珠自笑此物吾家無君當置酒我當賀有兒傳業更  
何須

寄周安孺茶

大哉天宇內植物知幾族靈品獨標奇迥超凡艸木名從  
姬旦始漸播桐君錄賦詠誰最先厥傳惟杜育唐人未知  
好論著始於陸常李亦清流當年慕高躅遂使天下士嗜  
此偶於俗豈但中土珍兼之異邦竊鹿門有佳士博覽無  
不囑邂逅天隨翁篇章互唐續開園應出屏迹松江曲

有興卽揮毫燦然存簡牘伊予素寡愛嗜好木不篤越自  
少年時低回客京轍雖非曳裾者庇蔭或華屋頗見綺紈  
中齒牙厭粱肉小龍得屢試糞土視珠玉團鳳與葵花砧  
砧雜魚目貴人自矜惜捧玩且緘櫝未數日注卑定知雙  
井辱於茲自研討至味識五六自爾入江湖尋僧訪幽獨  
高人固多服揆究亦頗熟聞道早春時攜簏赴初旭驚雷  
未破蕾采采不盈掬旋洗玉泉蒸芳馨豈停宿須臾布輕  
縷火候謹盈縮不憚煩間勞經時廢藏蓄髣髴淨無染箸  
籠勻且複苦畏熱潤候暖頰人氣煥有如剛耿性不受纖  
芥觸又若廉夫心難將微穢瀆晴天敞虛府石碾破輕綠  
永日遇閑賓乳泉發新馥香濃奪蘭露色嫩欺秋菊閩俗

競傳誇豐腴面如粥自云葉家白頰勝山中醪好是一杯  
淡午牕春睡足清風擊兩腋去欲凌鴻鵠嗟我樂何淺水  
經亦屢讀陸子咤中冷次乃康王谷螭碣頃曾嘗瓶罌走  
僮僕如今老且懶細事百不欲美惡兩俱忘誰能強追逐  
薑鹽拌白土稍稍從吾蜀尚欲外形體安能徇心腹由來  
薄滋味日飯止甞菜外慕旣已矣胡爲此羈束昨日散幽  
步偶上天峯麓山圃正春風蒙茸萬旗簇呼兒爲佳客採  
製聊亦復地僻誰我從包藏置廚簏何嘗較優劣但喜破  
睡速况此夏日長人間正炎毒幽人無一事午飯飽蔬菽  
困卧北牕風風微動牕竹乳甌十分滿人世真局促意爽  
飄欲仙頭輕快如沐昔人周多癖我癖良可讀爲問劉伯

倫胡然枕糟麴

寄傲軒

先生英妙年一掃千鬼禿仕進固有餘不肯踐場屋通闕  
何所傲傲名非傲俗定知軒冕中享榮不償辱豈無自安  
計得失猶轉轂先生獨揚揚憂患莫能竄得如虎挾乙失  
若龜藏六茅簷聊寄寓俛仰亦自足東坡無邊春方寸盡  
藏蓄醉哦傍若無獨侑一樽醪牀頭車馬道殘月挂疎木  
朝客紛擾時先生睡方熟

次韻王定國得晉卿酒相畱夜飲

短衫壓手氣橫秋更著仙人紫綺裘使我有名全是酒從  
他作病且忘憂詩無定律君應將醉有真鄉我可俟且倒



餘樽盡今夕睡蛇已死不須鉤

壺中九華詩

并序

湖口人李正臣蓄異石九峯玲瓏宛轉若牕櫺然  
余欲以百金買之與仇池石爲偶方南遷未暇也  
名之曰壺中九華且以詩識之

我家岷蜀最高峯

一作青溪電  
轉失雲峯

夢裏猶驚翠掃空五嶺莫

愁千嶂外九華今在一壺中天池水落層層見

一作石泉  
影落涓涓

滴玉女牕明處處通念我仇池太孤絕百金歸買小

一作碧

玲瓏

歇白塔舖

甘山廬阜鬱長望林隙依稀

一作  
熈微

滿日光吳國晚蠶初斷

葉占城早稻欲移秧迢迢澗水隨人急冉冉巖花撲馬香  
望眼儘從一作窮飛鳥遠白雲深處是吾鄉宋真宗購占城早稻賜江淮民  
種之他本誤刻早稻非是

西蜀楊耆二十年前見之甚貧今見之亦貧所異於  
昔者蒼顏華髮耳女無美惡富者妍士無賢不肖貧  
者鄙使其逢時遇合豈減當世之士哉頃宿長安驛  
舍聞泣者甚怨問之乃昔富而今貧者乃作一詩今  
以贈楊君

孤邨漸

一作微

雨逐秋涼逆旅愁人怨夜長不寐相看惟櫪

馬愁吟

一作悲歌

互答有寒蠶天寒滯穗猶橫畝歲晚空機尚

倚牆勸爾一杯聊復睡人間貧富海茫茫

獄中寄子由二首

聖主如天萬物春小臣愚暗自忘身百年未滿先償債十口無歸更累人是處青山可埋骨他年夜雨獨傷神與君世世爲兄弟更結人間未了因

柏臺霜氣夜淒淒風動琅璫月向低夢遶雲山心似鹿魂飛湯火命如雞眼中犀角真吾子身後牛衣愧老妻百歲神遊定何處桐鄉知葬浙江西

獄中聞湖杭民爲余作解厄齋經月所以有此句也

朱邑葬桐鄉還角杜琮事

出獄次前韻二首

百日歸期恰及春殘生樂事最關身出門便旋風吹而走馬聯翩鵲啁人却對酒杯渾是夢試拈詩筆已如神此災

何必深追咎竊祿從來豈有因

平生文字爲吾累此去聲名不厭低  
寒上縱歸他日馬城中不闌少年雞  
休官彭澤貧無酒隱几維摩病有妻堪笑

睢陽老從事爲余投檄向江西

子由聞余下獄乞以官  
爵贖罪貶筠州監酒

惠州近城數小山類蜀道春與進士許穀野步會意

處飲之且醉作詩以記適參寥專使欲歸使持此以

示西湖之上諸友庶使知余未嘗一日忘湖山也

夕陽飛絮亂平蕪萬里春前一酒壺  
鐵化雙魚沈遠素劍分二嶺隔中區  
花曾識面香仍好鳥不知名聲自呼  
夢想平生消未盡滿林烟月到西湖

軒牕

東鄰多白軒夜作雨聲急牕下獨無眠秋蟲見燈入

和陶歸田園居

環州多白水際海皆蒼山以彼無盡景寓我有限年東家  
著孔丘西家著顏淵市爲不二價農爲不爭田周公與管  
蔡恨不茅三間我飽一飯足薇蕨補食前門生餽薪米救  
我厨無烟斗酒與隻雞酣歌餞羣顛禽魚豈知道我適物  
自閑悠悠何必爾聊樂我所然

窮猿既投林疲馬初解鞅心空飽新得境熟夢餘想江鷗  
漸馴集蜚叟已還往南池綠錢生北嶺紫笋長提壺豈解  
飲好語時見廣春江有佳句我醉墮渺莽

和陶王撫軍座送客

再送  
張中

胸中有佳處海瘴不能排三年無所愧十口今同歸汝去  
莫相憐我生本無依相從大塊中幾合幾分違莫作往來  
相而生愛見悲悠悠含山日炯炯留清暉懸知冬夜長不  
恨晨光遲夢中無與別作詩記忘遺

和陶怨詩楚調示龐主簿鄧治中

當歡有餘樂在戚亦頽然淵明得此理安處故有年嗟我  
與先生所賦良奇偏人間少宜適惟有歸耘田我昔墮軒  
冕毫釐真市塵困來卧重裯憂愧自不眠如今破茅屋一  
夕或三遷風雨睡不知黃葉滿枕前寧當出怨句慘慘如  
孤烟但恨不早悟猶推淵明賢

和陶移居

予去歲三月自水東嘉祐寺遷居合江樓迨今年多病寡歡頗懷水東之樂也得歸善縣後隙地數畝父老云古白鶴觀也意欣然欲居之乃和此

詩

昔我初來時水東有幽宅晨與烏鵲朝暮與牛羊夕誰令遷近市日有造請役歌呼雜闐巷鼓角鳴枕席出門無所詣樂事非宿昔病叟獨彌年束薪誰與析

洞潭轉碕岬我作江郊詩今爲一廛氓此地乃得之葺爲無邪齋思我無所思古觀廢已久白鶴歸何時我豈丁令威千歲復還茲江山朝福地古人不我欺

和陶癸卯歲始春懷古田舍

茅茨破不補嗟子乃爾貧菜肥人愈瘦竈閑井常勤我欲  
致薄少解衣勸坐人臨池作虛堂雨急瓦聲新客來有美  
載果熟多幽欣丹荔破玉膚黃柑溢芳津借我三畝地結  
茅爲子隣鳩舌倘可學化爲黎母民

和陶飲酒

道喪士失已出語輒不情江左風流人醉中亦求名淵明  
獨清真談笑得此生身如受風竹掩冉衆葉驚俯仰各有  
態得酒詩自成

蝨蠕食葉蟲仰空慕高飛一朝傳兩翅乃得粘網悲咽啾  
厭巢雀沮澤疑可依赴水生兩殼遭閉何時歸二蟲竟誰  
是一笑百念衰幸此未化間有酒君莫違



小舟真一葉下有晴浪喧夜棹醉中發不知枕几偏天明  
問前路已度千重山嗟我亦何爲此道常往還未來寧早  
計旣往復何言

籃輿兀醉守路轉古城隅酒力如過雨清風消半途前山  
正可數後騎且勿驅我綠在東南往寄白髮餘遙知萬松  
嶺下有三畝居

和陶庚戌歲九月中於西田穫早稻

蓬頭二猾奴誰謂愿且端晨興洒掃罷飽食不自安願治  
此圃畦少資主遊觀晝功不自覺夜氣乃潛還早韭欲爭  
春晚菘先破寒人間無正味美好出艱難早知農圃樂豈  
有非意于尚恨不持鉏未免辭我顏此心苟未降何適不

間關休去復歇去菜食何所歎

和陶雜詩

斜日照孤隙始知空有塵微風動衆竅誰信我忘身一笑  
問兒子與汝定何親從我來海南幽絕無四隣耿耿如缺  
月獨與長庚晨此道固應爾不當怨尤人

和陶擬古

有客叩我門繫馬門前柳庭空鳥雀散門閉客立久主人  
枕書卧夢我平生友忽聞剝啄聲驚散一杯酒倒裳起謝  
客夢覺兩愧負坐談雜今古不荅顏愈厚問我何處來我  
來無何有

客去室幽幽鵬鳥來坐隅引吭伸兩翮太息意不舒吾生

東坡詩選  
如寄耳何者爲吾廬去此復何之少安與汝居夜中聞長  
嘯月露荒榛蕪無問亦無答吉凶兩何如